

四庫全書

集部

欽定四庫全書

集部

鄭峰真隱漫錄卷四十三至五

詳校官庶吉士_臣李如筠

主事_臣呂雲棟覆勘

總校官降調編修_臣倉聖脉

校對官助教_臣卜維吉

謄錄監生_臣李從亨

欽定四庫全書

節峯真隱漫錄卷四十三

宋 史浩 撰

祭文

祭八十叔父文

嗚呼仁者不必壽壽者不必有仁天曷敝予哀族俄遽奪之善人嗟我季父孝於父母入躬定省出當幹蠱知無不為親始裕如闔門千指由之不知嗟我季父友於

昆弟我父云沒實賴以濟上水之阡松楸翁然說者或謂後益綿綿嗟我季父信於州里急人之急奮不謀己物來能名一以至誠隨彼巨細各得其情嗟我季父耽於典籍志窮精微不墮塵跡探仁義於皇王究治亂於家邦孰謂蘊荆山之美玉而竟不得發其光嗟我季父美於詞翰氣飄飄而凌雲自謂所得在於西漢文光萬丈筆力千鈞喬松戛空撼風雨鷲鳥舉翮連青雲嗚呼備此數德不偕貴位兩上禮闈事左不利命也如何公

實知之不愠於懷惟日嬉嬉王公貴勢蚊飛燕逝世俗
炎涼曾不芥蒂今歲始春金兵破鄆公奉嚴親奔於海
垠曰姊妹姑五族以趨不間踈戚通其有無敵將壓境
俄有歸令公以一身活百人命謂當百歲福祿是邁胡
為一病止於四十有四之春秋方公病亟祖喪三日尚
未經經哀號而卒有以見終始於孝道周旋於禮律者
也昔者曾子正而斃焉死生之際公獨比肩嗚呼哀哉
公今去矣有子童稚尚期遺德一日千里寔是臨敢

奠薄菲拊棺一慟慟淪骨髓

祭妹夫朱辨之文

嗚呼蒼蒼者天其可問否耶造化之權其亦有掣肘耶
嗟嗟辨之不得其壽而徒得其孝謹忠厚不畀以貴而
徒畀以淵源師友家富於財不遂享其安逸而徒遺少
妻弱子於其身後嗚呼蒼蒼其果可問否耶造化其真
有掣肘耶自我女弟來嬪於君數年相從得君為人三
同場屋得君為文意君壽可黃髮而貴必青雲胡為坎

止三十四春去冬日至余妻抱疾竭來城居朝不謀夕
聞君病革既不獲問疾於床俄以訃至又不獲往臨其
喪今茲窀穸復當西去而裹糧慨音容之邈矣始來奠
於一觴嗚呼其知者謂余多故而若此其不知者謂余
與辨之遽以相忘嗟嗟辨之死而不忘英靈如在庶幾
鑒余之衷腸

祭滕子駿文

嗚呼洪範五福壽為稱首好德考終以壽克究嗟嗟子

駿百行具有天實畀之於壽則否君之學問可以鍼左
氏之膏肓發公羊之墨守君之文章可以齊李杜之光
焰埒度尚之鑿臼君之識見可以漸游夏之淵源窺孔
孟之戶牖君之議論可以敵吐屑之高談屈雌黃之衆
口君之氣宇可以激天池之三千吞雲夢之八九天胡
不仁獨嗇其壽使此數長無一獲售頃在賢闕謂宜成
就四方英傑爭先師友洎丁秋闈弗克論秀嗟嗟子駿
嗇者何薄而畀者何厚念我昔年謀生掣肘世情炎涼

如翻覆手君時毅然絜提左右羣嘲聚誚君亦安受仰
茲鉅德泰山北斗意其貴必青雲而壽斯黃耆豈伊一
疾遽以不救天曷其極先喪厥偶不踰旬時堂列二柩
西圃悠然南挹羣岫昔以賓朋飛觴燕豆今為同穴松
楸岡阜弔者盈門誰不悲疚幸君有子芝蘭瓊玖異時
騰奮實大君後君其瞑目死當不朽嗚呼方君之喪我
適卧病於林藪及君之葬我復裹糧而西走嗟泣奠之
無從徒凝哀而莫剖朔東風以寓文尚來歆於卮酒

祭叔母齊安郡夫人孫氏為母氏作

惟靈幽閨玉潔兮塵壺蘭芳笄字來嬪兮媚于尊章相
夫子而贊鈞衡兮闡化源於中堂寶繒金鈿兮拜寵渥
之熒煌實天介其遐報兮視黃岡而啟疆方嬉娛而宴
喜兮暢偕老而色康臻脩景之希有兮樂化日之舒長
俄夜壑之舟移兮慨齷露之晞陽嗚呼哀哉我為冢婦
靈實介兮方相得而益彰蒼顏鶴髮年相若兮孰謂靈
遽返於僊鄉聽鼓盆於黼帳兮聞嬰慕而悲傷幸佳城

之兆吉兮將褭奉於東岡心旌搖兮遠望身匏繫兮莫
遑盼靈輻之啟道兮紛雨淚而滂滂寓哀情於寸紙兮
陳菲儀於一觴靈而有知兮擁珠葆而來嘗

祭諸葛機宜文

惟靈生長東嘉月評所推文采可觀德義可師晚登上
第世與我違閉門却掃不求聞知交游勸勉結綬王畿
得官長樂枳棘卑飛我帥七閩一見竒之絮置幕府機
密是咨叩之凝然如萬頃陂即之飄然如千里騅剡奏

九閻將究設施胡為一疾竟喪大期方君卧枕我即命
醫君曰病渴泉溺無時使人染指其甘如飴是殆將死
其又奚疑語未信宿俄以訃馳使我怛焉咨嗟涕洟問
其所親屬續何詞答云治命神色怡怡疊紙數幅援筆
一揮貽書故人俾訓吾兒有田二頃可以無饑裂其疆
半為姊妹贖迺祝母氏善保壽祺某也不孝莫侍庭闈
惟弟與妹尚克扶持迺告室人吾其語離死婦人手丈
夫弗為汝宜亟去勿過傷悲言訖奄然舉體如遺伊君

篤行出於天姿行年五十冰玉無疵死生之際不挂一
絲賢者易箠哲人其萎君今掉鞅與之同歸嗚呼我得
君重君方我依今其往矣助我者誰弔以斯文莫寫哀
思魂其來兮歆此一卮

祭汪聖錫端明文

惟公為善不期於近名而令聞廣譽若形影之必隨輸
忠不期於自銜而危言讜論若星日之昭垂至如文為
世範政擅吏師則又天下以為不可企及而公之所優

為備此數德皆世表儀獨於濟時行道則若有物尼其足而不得馳此易簣之日學士大夫識與不識莫不咨嗟而涕洟某生有幸會與公同時道山數月飽承風規外溫而厲中曠而夷使人叩之無弗獲即之不忍離而况酒酣握手各以器業而相期概之古人允謂已知茲焉聞訃倍切哀思想公英爽御風騎氣已徜徉於八極之表與造物者同歸回視舊游真若蚊雷之在汙池儻未忘情歆我一卮

祭曾原伯大卿文

伊昔東魯秀萃山川萊蕪邨伯奕葉生賢跨漢歷唐寂
寥千年迄於我宋衣鉢始傳惟公有尊道德純全文傑
昭代炳炳遺編公為冢嗣風烈隱然忠孝蘊蓄亦輩淵
騫出擁星軺主意備宣歸聯月寺讞議無寃謂宜持橐
亟上甘泉力以所學陳於王前云胡小疾醫莫能痊仁
者不壽孰詰彼天尤可念者庭方殖萱想公齋志此恨
綿綿幸今棣萼闊步英躔晨昏定省得奉周旋公其瞑

目脫屣塵緣逍遙世表造物羞肩顧我與公雅相知憐
茲聆訃音中實怛然匍匐往救膂力既愆寓哀一奠心
折涕漣

祭湖心廣福院魏王祠文

洪惟昭代克生賢王王出為郡我還故鄉邂逅相遇念
舊不忘或陪燕俎或和詩章間得共醉樂未渠央我忽
環召再坐廟堂王猶符竹譽謁龔黃遂加牧伯寵命煌
煌謂宜三錫入覲吾皇蘭陔戲綵密侍清光九重注想

指日治衰夫何屬疾趣駕莫遑及我告歸王已穴藏歸
然壇壝廟食此方顧瞻貌像寧不盡傷惟王陰德蔭美
甘棠雖云往矣死而不亡必與造物八極翱翔今茲寓
奠肴茗馨香王其來兮歆此一觴

祭陳丞相文

惟公德尊一代忠結兩朝身翔丹禁步穩青霄恭惟初
政方撫弊凋惟時督府欲奮旌旄衆口應和鹽梅莫調
上乃命公入幕為寮公陳自治用抑其議既不可遏卒

至敗事人皆謂公緩頰詞費觀兵非時豈公本志暨公
歸班上益注意進長羣材登庸政地乾坤清寧三光昭
明水旱不作萬國昇平赫赫真主商宗周成是宜康輔
億載萬齡乃退急流鴻飛冥冥雍容綠野為世耆英方
祈壽祉遽隨逝水天不憖遺人失依倚云亡之歎情曷
能已我昔定交更相知已挽公上道逸駕同軌迄如所
期歡好終始歲晚江湖絡繹音書渠渠問勞風義凜如
問以詩筒健句起予龍蛇飛動筆力豐腴老當益壯古

語非虛今其長往使我嗟吁幸哉有子召公是似他年
閱閱世濟其美公在九原可無憾矣載瞻素旌邈數千
里雪涕遣介奠茲薄菲靈其來兮鑒我心膺

姊太宜人安厝祭文

嗚呼我生膝下少姊二春姊在髻髻已如成人惟祖父
母及吾二親凡有疾苦色憂涕洟為粥為藥靡懈昏晨
迄於良已始克欣欣我自提孩瘡痍滿身膿潰流染展
轉頓呻姊於是時便能撫循焚膏繼晷澣濯縫紉暨於

諸弟友悌惟均伊其稟賦實自天真故我祖母撫姊而
云汝之敬愛迥然不羣知誰婦汝必有嘉姻長適陳門
事姑恂恂姑亦祝姊受福無垠是故報施率由穹昊身
享上壽三拜恩綸子女盡孝室家綦綦考終之日宗黨
歸仁遺德在後踵武簪紳人生具此豈曰無因某掛冠
歸老卜築湖濱與姊居室相望為鄰良辰聚首豈樂斯
頻謂當期頤同此燕申胡為小疾遽以沈淪使我暮途
觸景悲辛茲焉窀穸莫以芳醇病阻臨穴慟泣沾巾

祭表弟貝叔懷省幹文

惟靈學足裕身材能幹盡刻意儒業思紹父祖場屋失利生計益窶出贅異縣期立門戶攻苦食淡銖積寸累迄于有成居列倉庾我實中表常加存撫晚薦於朝遂縈簪組捧檄丹丘權酤是處廉介自將一毫不取意其遠大亨衢闊步豈伊微疾遽終官所嗚呼哀哉他人有命蔭子封婦他人有家歌童舞女惟吾叔懷儉約如故憂歷丘山樂無絲縷年踰上壽竟亡羈旅此鄉黨親戚

所以悼其晏暮有貲而不享憐其平生徒勞而無補也
二子奔喪靈輿克舉尚祈肖似以昌厥緒我欲往弔江
山修阻寓哀薄奠有淚如雨

祭潘德廊經畧文

惟靈仕踵名宦學傳聖謨孝悌忠信兮訓諸子弟睦婣
任恤兮表諸鄉閭文章兮士爭嗜如膾炙翰墨兮人珍
藏若金珠三畿甸兮持節兩帥閭兮分符布宣上德兮
風行列郡撫育吾民兮譽滿寰區壽皇倦勤兮遜寶位

聖主嗣德兮御皇圖
亟下絲綸兮召為宰
柱力輸悃幅兮願息
田廬茂松菊兮三徑
佳山水兮五夫上貪
賢兮猶煩共理畀舊
職兮遲次當塗明目
兮視千鍾為燕雀高
懷兮渺一世於錨銖
彼突梯脂韋兮老乎
行役甘卑陬齷齪兮
大耋嗟吁以吾止足
兮較彼奔競其相去
兮何啻清溝與汙渠
方徜徉於雲外兮享
人間之清福宜得壽
於無窮兮與彭聃而
為徒俄嬰疾兮腹有
河魚之變正而終兮
又何羨於首丘之狐
搢紳嘖戚兮為之傷

盡慘慘兮為之號呼念我平生兮投分甚密晚聯姻好
兮愛女遣妻於吾雛雖相望於異縣兮一潮汐而可至
將杖屨之過從兮命肴醑於盤盂豈伊今日兮白玉樓
成於天上宿約乖違兮乃遽莫於生芻顧愆筋力兮未
獲拊棺而一慟寓哀於辭兮徒涕泣以永鬚

祭王季海丞相文

惟公生遭興運少負奇材金閨紫微演卿雲黼黻之詞
藻玉堂黃閣陳禹臯都俞之謀謨周旋半世以有餘

敬歷兩地而幾徧不離京輦卒踐鼎司直道公心何恤
風波之洶湧竭力盡瘁惟期日月之照臨撓不濁而澄
不清柔不茹而剛不吐難與流俗言也當於古人求之屬
萱堂起故鄉之思歸相印遂真祠之請樂林泉而未久
悵風木以纏悲創巨奚堪痛深致毀病惟啜粥食不御
葷氣血漸羸精神亦耗雖醫巫之並用奈藥石之無功
曾不終喪迄成長往會時逢於揖遜慶治洽於雍熙當
寧隆念舊之恩指日遲奪情之命方芝封之欲草俄薤

露之先晞一旦計聞兩宮痛悼始陞孤棘荐贈公槐肆
典冊之哀榮播寰區而聳動嗚呼論臣子之大戒惟忠
孝之二途公忠以事君誠而弗偽孝以事母死且不渝
此實萬世之楷模宜特一時之矜式宜乎高門陰德報
在子孫蓋代洪勲銘諸彝鼎有識共贊不約同辭念我
生平與公友善題名鴈塔猥預聯鑣筵跡鳳池居慙揚
粃矧吾幼女得壻賢郎既姻契之綢繆故恩情之款密
云亡之亟賈涕何窮慨筋力之衰遲怯江山之修阻凝

睇千里寓哀一觴靈其有知鑒此精意

祭無垢先生張公侍郎文

惟公學承正宗文肩前輩卓行珠玉淨無瑕類射策廣
庭英俊如蝟公以萬言奉當大對臚唱哀然名喧海內
持橐從班表率在位退食私室門多旌旆一世人龍孰
不愛畏晚守永嘉吏課推最不施刑威專用教誨力叙
彝倫俾俗純粹某掌郡庠時適相值傾葢忘年雅同聲
氣乃以旦日衣冠畢萃端笏趨隅薦牘見遺公云舉詞

深有旨味識超幾先意傳經外惟此八字三宵不寐思
而得之實錄無愧佩服華衮銘在心志子壻宰邑拜公
墓隧命掃松楸常加葺治報以峻事老懷良慰幽潛重
光山明水媚九原可作嗚呼茲地惟公生有盛德沒為
神類與造物遊間須一至千里寓奠酒醪牲饌追念知
已臨風墮淚

祭沈叔晦國錄文

嗚呼叔晦淳真資稟不羣試舉大畧可悉其人以言其

道得師深造優入聖域能窺閭奧以言其材知悟心開
何患事物紛至沓來以言其學正而不駁因流知源橫
渠伊洛以言其文傑出橋門兩優上第名亞省元以言
其狀修髯廣顙鶴立鷄羣咸知敬仰以言其言時然後
宣齒牙餘論學者爭傳嗚呼人有一善必膺世選君兼
數者乃不通顯遲次佐州獲未及收遽以淪歿命不為
謀嗚呼上不獲終養於母氏下不逮延賞於諸子此意
蕭條可哀也已
有酒既清有肴既馨寓茲一奠心折涕

零

鄧峯真隱漫錄卷四十三

欽定四庫全書

鄮峯真隱漫錄卷四十四

宋史浩撰

闕

鄮峯真隱漫錄卷四十四

欽定四庫全書

鄮峰真隱漫錄卷四十五

宋 史浩 撰

大曲

採蓮 壽鄉詞

延遍

霞霄上有壽鄉廣袤無際東極滄海縹渺虛無蓬萊弱
水風生舞浪鼓檝揚旂不許凡人得至甚幽邃褻試右

望金樞外西母樓閣玉闕瑤池萬頃琉璃雙成倩巧方
朔恢諧來往徜徉霓裳飄颻寶砌更希奇

擷遍

南隣幄丹宮赤伏顯符記朱陵曜綺繡箕翼炯光騰起
每歲秋分老人見表皇家襲慶迎禧 天子當膺無疆
萬歲北窺元冥魁杓擁佳氣長拱極終古無移論南北
東西相直何啻千萬里信難計

八破

璇穹層雲上覆光景如梭逝惟此過隙緩征轡垂象森
列昭回碧落卓然纏度炳曜更騰輝永永清光暉煒綿
四野金壁為地藥珠館瓊玖室俱高峙千百種奇葩松
椿可比暗香幽馥歲歲長春陽烏何曾西委

袞遍

徧此境人樂康挾難老術悟長生理盡阿僧祇劫赤松
王令安期彭篋盛矣尚為嬰稚鶴筭龜齡絳老休誇甲
子鮐背聳黃髮垂髻更童顏長鼓腹同遊戲真是華胥

行有歌坐有樂獻笑都是神仙時見羣翁啓齒

實催

露華霞液雲漿椒醕恣玉斝金壘交酬成雅會拌沉醉
中山千日未有長久今此陶陶一飲動經萬祀 陳果菴
皆是奇異似瓜如斗盡備三千歲一熟珍味釘坐中瑩
似玉爽口流涎三偷不枉西真指議

袞遍

有珍饌時時饋滑甘豐賦紫芝熒煌嫩菊秀媚實碼瑤

琥珀精器延年益壽莫擬人間烹飪徒費休說龍肝鳳
髓動妙樂仙音鼎沸玉簫清瑤瑟美龍笛脆雜運飛鸞
花裊上趁拍紅牙餘韻悠颺竟海變桑田未止

歇拍

其間有洞天侶思遊塵世珠葆搖曳華表真人清江使
者相從密議此老逮嬉我輩應須隨侍正舉步忽思同
類十八公方聳壑宜邀致夙駕星言人爭圖繪竭來鄞
山甬水因此崇成四明里第

煞袞

吾皇喜光寵無貳玉帶金魚榮貴或者疑之豈識聖明
曾主斯鄉常相與盡繾綣膠漆何可相離今日風雲合
契此實天意吾皇聖壽無極享晏繁千載相逢我翁亦
昌熾永作昇平上瑞

採蓮舞

五人一字對廳立竹竿子勾念

伏以濃陰緩轡化國之日舒以長清奏當筵治世之音

安以樂霞舒絳綵玉照鉛華玲瓏環珮之聲綽約神仙
之伍朝迴金闕宴集瑤池將陳倚棹之歌式侑回風之
舞宜邀勝伴用合仙音女伴相將採蓮入隊

勾念了後行吹雙頭蓮令舞上分作五方竿子
又勾念

伏以波涵碧玉搖萬頃之寒光風動青蘋聽數聲之幽
韻芝華雜遝羽憶飄飄疑紫府之羣英集綺筵之雅宴
更憑樂部齊逐來音

勾念了後行喚採蓮令舞轉作一直了衆唱採
蓮令

練光浮煙斂澄波渺燕脂濕靚粧初了綠雲繖上露滾
滾的藥真珠小籠嬌媚輕盈佇立無言不見仙娥凝望
蓬島 玉闕忽忽鎮鎖佳麗春難老銀潢急星槎飛到
暫離金砌為愛此極目香紅遶倚蘭棹清歌縹渺隔花
初見楚楚風流年少

唱了後打吹分作五方竹竿子勾念

伏以暹雲妙響初容與於波間回雪奇容乍娉娉於澤
畔愛芙蕖之豔冶有蘭芷之芳馨躑蝶凌波洛浦
未饒於獨步雍容解佩泣臯諒得以齊驅宜到堦前分
明祇對

花心出念

但兒等玉京侍席久陟仙堦雲路馳驟乍遊塵世喜聖
明之際會臻夷夏之清寧聊尋澤國之芳雅寄丹臺之
曲居慚鄙俚少頌昇平未敢自專伏候處分

竹竿子問念

既有清歌妙舞何不獻呈

花心荅問

舊樂何在

竹竿子再問念

一部儼然

花心荅

再韻前來

念了後行吹採蓮曲破五人衆舞到八破先兩
人舞出舞到裊上住當立處訖又二人舞又住
當立處然後花心舞徹竹竿子念

伏以仙裾搖曳擁雲羅霧縠之奇紅袖翩翻極鸞翮鳳
翰之妙再呈慶瑞一洗凡容已奏新詞更留雅詠

念了花心念詩

我本清都侍玉皇乘雲馭鶴到仙鄉輕舸一葉煙波闊
嗜此秋潭萬斛香

念了後行吹漁家傲花心舞上折花了唱漁家

傲

藥沼清冷涓滴水迢迢煙浪三千里微孕青房包繡綺
薰風裏幽芳洗盡閒桃李 羽筆飄蕭塵外侶相呼短
棹頻偎倚一片清歌天際起聲尤美雙雙鷺起鴛鴦

睡

唱了後打吹漁家傲五人舞換座當花心立人

念詩

我昔瑤池飽宴遊，
朅來樂國已三秋。
水晶宮裏尋幽伴，
菡萏香中蕩小舟。

念了後行吹漁家傲，
花心舞上折花了唱漁家
傲。

翠蓋參差森玉柄，
迎風浥露香無定。
不著塵沙真體淨。
蘆花徑酒侵酥臉，
霞相映。棹發木蘭煙水暝。
月華如練，
秋空靜。一曲悠颺沙鷺聽。
牽清興，香紅已滿蒹葭艇。
唱了後行吹漁家傲，
五人舞換座當花心立人。

念詩

我弄雲和萬古聲至今江上數峰青
幽泉一曲今憑棹
楚客還應着耳聽

念了後行吹漁家傲
花心舞上折花了唱漁家
傲

草軟沙平風掠岸青
蓑一釣煙江畔荷葉為裯
花作幔
知誰伴醇醪只把鱸魚換
盤縷銀絲杯自煖蓬窗醉
著無人喚逗得醒來橫
脆筦清歌緩彩鸞飛去紅雲亂

唱了後行吹漁家傲五人舞換當座花心立人

念

我是天孫織錦工龍梭一擲度晴空蘭橈不逐仙槎去
貪擷芙蓉萬朵紅

念了後行吹漁家傲花心舞上折花了唱漁家
傲

太華峰頭冰玉沼開花十丈千雲杪風散天香聞四表
知多少亭亭碧葉何曾老 試問霏煙登鳥道丹崖步

步祥光遠折得一枝歸月嶠蓬萊島霞裾侍女爭言好
唱了後行吹漁家傲五人舞換座當花心五人

念詩

我入桃源避世紛太平才出報君恩白龜已閱千千歲
卻把蓮巢作酒樽

念了後行吹漁家傲花心上舞折花了唱漁家
傲

珠露溥溥清玉宇霞標倬約消煩暑時馭清風之帝所

尋仙侶三千侶仗臨煙渚
舴艋飄飄來復去漁翁問
我居何處笑把紅蕖呼鶴馭
回頭語壺中自有朝天路
唱了後行吹漁家傲五人舞
換座如初竹竿子

勾念

伏以珍符薦至朝廷之道格高深
年穀屢豐郡邑之和薰遐邇式均
懽燕用樂清時感游女於仙衢詠
奇葩於水國折來和月露浥霞腮
舞處隨風香盈翠袖既徜徉於玉
砌宜宛轉於雕梁爰有佳賓冀聞
清唱

念了後衆唱畫堂春

彤霞出水弄幽姿
娉婷玉面相宜
棹歌先得一枝枝
波上畫鯨飛
向此畫堂高會
幽韻散堪引
瑤卮幸然逢
此太平時不醉可無歸

唱了後行吹畫堂春衆舞舞了衆又唱河傳

藥宮閨苑聽鈞天帝樂
知他幾遍爭似人間一曲採蓮
新傳柳腰輕鶯舌轉
逍遙煙浪誰羈絆
無奈天階早已催班轉
卻駕彩鸞笑容斜盼
願年年陪此宴

唱了後行吹河傳衆舞舞了竹竿子念遣隊
浣沙一曲媚江城雅合鳧鷖醉太平楚澤清秋餘白浪
芳枝今已屬飛瓊歌舞既闌將好去

念了後行吹雙頭蓮令五人舞轉作一行對廳
杖鼓出場

太清舞

後行吹道引曲子迎五人上對廳一直立樂住
竹竿子勾念

洞天門闕鎖煙蘿瓊室瑤臺瑞氣多欲識仙凡光景異
歡謠須聽太清歌

花心念

伏以獸爐縹緲噴祥煙玳席熒煌開邃幄諦視人間之
景物何殊洞府之風光恭惟袞繡主人簪纓貴客或碧
瞳漆髮或綠鬢童顏雄辯風生英姿玉立曾向藥宮貝
闕為逍遙游俱膺丹篆玉書作神仙伴故今此會式契
前蹤但兒等偶到塵寰欣逢雅宴欲陳末藝上助清歡

再韻前來

念了後行吹太清歌衆舞訖衆唱

武陵自古神仙府有漁人迷路洞戶迸寒泉汎桃花容
與尋花迤邐見靈光捨扁舟飄然入去注目渺紅霞
有人家無數

唱了後行吹太清歌衆舞舞訖花心唱

須臾卻有人相顧把肴漿來聚禮數既雍容更衣冠淳
古漁人方問此方鄉衆顰眉皆能深訢元是避嬴秦

共攜家來住

唱了後行吹太清歌衆舞換座當花心一

人唱

當時脫得長城苦但熙熙朝暮上帝錫長生任跳丸烏
兔種桃千萬已成陰望家鄉杳然何處從此世凡人隔
雲霄煙雨

唱了後行吹太清歌衆舞換座當花心一人唱

漁舟之子來何所盡相猜相語夜宿玉堂空見火輪飛

舞凡心有慮尚依然復歸指維舟沙浦回首已茫茫歎
愚迷不悟

唱了後行吹太清歌衆舞換座當花心一人唱
我今來訪煙霞侶沸華堂簫鼓疑是奏鈞天燕瑤池金
母卻將桃種散階除俾華實須看三度方記古人言信
有緣相遇

唱了後行吹太清歌衆舞換座當花心一人唱
雲駢羽憶仙風舉指丹霄煙霧行作玉京朝趨兩班鴛

鴛玲瓏環珮擁霓裳卻自有簫韶隨步含笑囑芳筵後
會須來赴

唱了後行吹太清歌衆舞舞訖竹竿子念

欣聽嘉音備詳仙跡固知玉步欲返雲程宜少駐於香
車佇再聞於雅詠

念了花心念

但兒等暫離仙島來止洞天屬當嘉節之臨行有清都
之覲芝華羽葆已雜還於青冥玉女仙童正逢迎於黃

道既承嘉命，聊具新篇。

篇曰

仙家日月如天遠，人世光陰若電飛。絕唱已聞驚列座，
他年同步太清歸。

念了衆唱破子

游塵世列仙鄉，喜君王躋治。虞唐文德格，遐荒四裔盡。
來王干戈偃息，歲豐穰三萬里。農桑歸去，告穹蒼。錫聖
壽無疆。

唱了後行吹步虛子四人舞上勸花心酒花心
復勸勸訖衆舞列作一字行竹竿子念遣隊
仙音縹緲麗句清新既歸美於皇家復激昂於坐客桃
源歸路鶴馭迎風抃手階前相將好去

念了後行吹步虛子出場

柘枝舞

五人對廳一直立竹竿子勾念

伏以瑞日重光清風應候金石絲竹間六律以皆調傑

侏兜離賞四夷之率伏請翻妙舞來奉多歡鼓吹連催
柘枝入隊

念了後行吹引子半段入場連吹柘枝令分作
五方舞舞了竹竿子又念

適見金鈴錯落錦帽踰躑芳年玉貌之英童翠袂紅綃
之麗服雅擅西戎之舞似非中國之人宜到階前分明
祇對

念了花心出念

但兒等名叅樂府幼習舞容當芳宴以宏開屬雅音而
合奏敢呈末技用讚清歌未敢自專伏候處分

念了竹竿子問念

既有清歌妙舞何不獻呈

花心答念

舊樂何在

竹竿問念

一部儼然

花心答念

再韻前來

念了後行吹三臺一遍五人舞舞罷後行再吹
射鵬遍連歌頭舞了衆唱歌頭

闕人奉聖

闕人朝人

主闕人闕

留伊得

荷花幸戲遇文明堯階上太平時六

闕

何不罷歲

久征舞柘枝

唱了後行吹朶

闕

遍一片吹了連吹撲胡蝶遍

舞轉謝酒了衆唱柘枝令

我是柘枝嬌女人

闕多風措

闕

一人住深妙學得

柘枝舞

闕

頭戴鳳冠

闕

織腰束素

闕

遍體錦

衣裳來呈柘枝歌舞

又唱

回頭卻望塵寰去喧盡堂簫鼓整雲鬟處曳

闕

霄愛一

曲柘枝舞好

闕

華封盛祝笑共指南山煙霧瑤桃仙酒

醉昇平望鳳樓歸路

唱了後行吹柘枝令舞舞了竹竿子念遣隊

雅音震作既呈吟鳳之儀妙舞徊翔巧著飛鸞之態已
洽歡娛綺席暫歸縹渺仙都再拜階前將好去

後行唱柘枝令出隊



鄭峰真隱漫錄卷四十五

欽定四庫全書

集部

鄭峰真隱漫錄卷四十六

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官助教臣卜維吉

謄錄監生臣李從亨

欽定四庫全書

鄭峰真隱漫錄卷四十六

宋史浩撰

大曲

花舞

兩人對廳自勾念

伏以騷賦九章靈草喻如君子詩人十詠奇花命以佳
名因其有香尊之為客欲知標格請觀一字之褒爰藉

品題遂作羣英之冠適當麗景用集仙姿玉質輕盈共
慶一時之會金樽潑灑式均四座之歡女伴相將折花
入隊

念了後行吹折花三臺舞上取花瓶又舞上對
客放瓶念牡丹花詩

花是牡丹推上首天家侍燕為賓友料應雨露久承恩
貴客之名從此有

念了舞唱蝶戀花侍女持酒果上勸客飲酒

貴客之名從此有多謝風流飛馭陪尊酒持此一卮同
勸後願花長在人間壽

舞唱了後行吹三臺舞轉換花瓶又舞上次對
客放瓶念瑞香花詩

花是瑞香初擢秀達人鼻觀通廬阜遂令聲價滿寰區
嘉客之名從此有

念了舞唱蝶戀花侍女持酒果上勸客飲酒

嘉客之名從此有多謝風流飛馭陪樽酒持此一卮同

勸後願花長在人長壽

舞唱了後行吹三臺舞轉換花瓶又舞上次對
客放瓶念丁香花詩

花是丁香花未刮青枝碧葉藏瓊玖如居翠幄道家妝
素客之名從此有

念了舞唱蝶戀花侍女持酒果上勸客飲酒

素客之名從此有多謝風流飛馭陪樽酒持此一卮同
勸後願花長在人長壽

舞唱了後行吹三臺舞轉換花瓶又舞上次對
客放瓶念春蘭花詩

花是春蘭栖遠岫竹風松露為交舊仙家珮劍羽霓裳
幽客之名從此有

念了後唱蝶戀花侍女持酒果上勸客飲酒

幽谷之名從此有多謝風流飛馭陪樽酒持此一卮同
勸後願花長在人長壽

舞唱了後行吹三臺舞轉換花瓶又舞上次對

客放瓶念薔薇詩

花是薔薇如綺繡春風滿架暉晴晝為多規刺少拘攣
野客之名從此有

念了舞唱蝶戀花侍女持酒果上勸客飲酒

野客之名從此有多謝風流飛馭陪樽酒持此一卮同
勸後願花長在人長壽

舞唱了後行吹三臺舞轉換花瓶又舞上次對

客放瓶念醪醑詩

花是醪釀紆翠袖釀泉曾入真珠溜更無塵氣到杯盤
雅客之名從此有

念了舞唱蝶戀花侍女持酒果上勸客飲酒

雅客之名從此有多謝風流飛馭陪樽酒持此一卮同
勸後願花長在人長壽

舞唱了後行吹三臺舞轉換花瓶又舞上次對
客放瓶念荷花詩

花是芙蓉冰玉漱人間暑氣何曾受本來泥滓不相關

淨客之名從此有

念了舞唱蝶戀花侍女持酒果上勸客飲酒

淨客之名從此有多謝風流飛馭陪樽酒持此一卮同
勸後願花長在人長壽

舞唱了後行吹三臺舞轉換花瓶又舞上次對
客放瓶念秋香花詩

花是秋香偏鬱茂姮娥月裏親栽就一枝平地合登瀛
仙客之名從此有

念了舞唱蝶戀花侍女持酒果上勸客飲酒

仙客之名從此有多謝風流飛馭陪樽酒持此一卮同
勸後願花長在人長壽

舞唱了後行吹三臺舞轉換花瓶又舞上次對

客放瓶念菊花詩

花是菊英真耐久長年只有臨風嗅東籬況是見南山
壽客之名從此有

念了舞唱蝶戀花侍女持酒果上勸客飲酒

壽客之名從此有多謝風流飛馭陪樽酒持此一卮同
勸後願花長在人長壽

舞唱了後行吹三臺舞轉換花瓶又舞上次對
客放瓶念梅花詩

花是寒梅先節候調羹須待青如豆為於雪底倍精神
清客之名從此有

念了舞唱蝶戀花侍女持酒果上勸客飲酒

清客之名從此有多謝風流飛馭陪樽酒持此一卮同

勸後願花長在人長壽

舞唱了後行吹三臺舞轉換花瓶又舞上次對

客放瓶念芍藥詩

芍藥來陪羣客後矜其末至當居右奇姿獨許侍花王
近客之名從此有

念了舞唱蝶戀花侍女持酒果上勸客飲酒

近客之名從此有多謝風流飛馭陪樽酒持此一卮同
勸後願花長在人長壽

舞唱了後行吹三臺舞轉放花瓶又舞上花裯
背花對坐唱折花三臺

算仙家真巧妙能使衆芳長繡組羽翮芝蔴不到世間
誰曾共凡花為伍 桃李謾誇艷陽百卉又無香可取
歲歲年年長是春何用芳菲分四序

又唱

對芳辰成良聚珠服龍粧環燕俎我御清風來此縱觀
還須折枝歸去 歸去藥珠繞頭一一是東君為主隱

隱青冥怯路遙且向臺中尋伴侶

唱了起舞後行吹折花三臺一遍舞訖相對坐
取盆中花插頭上又唱

歡塵寰烏兔走花謝花開能幾許十分春色一半遺愁
那堪飄零風雨爭似此花自然悄不待根生下土花
既凋春又長好帶花枝傾壽醕

又唱

是非場名利海得喪炎涼徒自苦至樂陶陶唯有醉鄉

誰人向此間知趣
花下一杯一杯且莫把光陰虛度
八極神游長壽仙
螺贏螟蛉休更覷

唱了侍女持酒果置裯上相對自飲飲訖起舞
三臺一遍自陳遣隊

伏以仙家日月物外風煙能令四季之奇葩會作一筵
之重客莫不香浮綺席影覆瑤階森然羣玉之林宛在
列真之府相逢今日不醉何時敢持萬斛之流霞用介
千春之眉壽歡騰絲竹喜溢湖山觀者雖多歎未曾有

也更願九重萬壽四海一家屢臻年穀之豐登永錫田
廬之快樂于是花驄嘶晚絳蠟迎霄飲散瑤池春在烏
紗帽上醉歸藥館香分白玉釵頭式因天上之芳容流
作人間之嘉話尚期再集益侈遐齡歌舞既終相將好
去

後行吹三臺出隊

劍舞

二舞者對廳立裊上竹竿子勾念

伏以玳席歡濃金樽興逸聽歌聲之溶曳思舞態之飄
颻爰有仙童能開寶匣干將莫耶之利器擅龍泉秋水
之嘉名鼓三尺之熒熒雲間雷閃橫七星之凜凜掌上
生風宜到芳筵同翻雅戲

二舞者自念

伏以五行擢秀百鍊呈功炭熾紅爐光噴星日斫新雪
刃氣貫虹霓斗牛間紫氣浮游波濤裏蒼龍締合久因
佩服粗習徊翔茲聞閬苑之羣仙來會瑤池之重客輒

持薄枝上侑清歡未敢自專伏候處分

竹竿子問

既有清歌妙舞何不獻呈

二舞者答

舊樂何在

竹竿子再問

一部儼然

二舞者答

再韻前來

樂部唱劍器曲破樂作舞一段

二舞者同唱霜天曉角

熒熒巨闕左右凝霜雪且向玉階掀舞終當有用時節
唱徹人盡說寶此制無折內使姦雄落膽外須遣豺狼
滅

樂部唱曲子作舞劍器曲破一段

舞罷二人分
立兩邊別兩

人漢裝者出對
坐卓上設酒果

竹竿子念

伏以斷蛇大澤逐鹿中原佩赤帝之真符接蒼姬之正
統皇威既振天命有歸勢雖盛於重瞳德難勝於隆準
鴻門設會亞父輸謀徒於起舞之雄姿厥有解紛之壯
士想當時之賈勇激烈飛颺宜後世之效顰回旋宛轉
雙鸞奏技四座騰歡

樂部唱曲子舞劍器曲破一段

一人左立者上
舞袖有欲刺右

坐客之勢又一人舞進前翼蔽之舞罷兩人舞
者並退漢裝者亦退復有兩人唐裝者出對坐

卓上設筆硯紙一人
換婦人裝獨立袖上

竹竿子念

伏以雲鬢聳蒼壁霧縠罩香肌袖翻素霓以連軒手握
青蛇而的礫花影下游龍自躍錦裯上踰鳳來儀軼態
橫生瑰姿譎起傾此入神之技誠為駭目之觀巴女心
驚燕姬色沮豈唯張長史草書大進抑亦杜工部麗句
新成稱妙一時流芳萬古宜呈雅態以洽濃歡

樂部唱曲子舞劍器曲破一段

作龍蛇蛟蜃曼
舞之勢兩人唐

裝者起二舞者一男一
女對舞結劍曲破曲徹

竹竿子念

項伯有功扶帝業大娘馳譽滿文場
合茲二妙甚奇特堪使佳賓酌一觴
霍如羿射九日落矯如羣帝驟龍翔
來如雷霆收震怒罷如江海凝清光

歌舞既終相將好去

漁父舞

四人分作兩行迎上對筵立漁父自勾念

鄮城中有蓬萊島不是神仙那得到萬頃澄波舞鏡鸞
千尋疊嶂環旌纛光天圓玉夜長清襯地濕紅朝不掃
賓主相逢欲盡歡昇平一曲漁家傲

勾念了二人念詩

渺渺平湖浮碧滿奇峰四合波光暖綠蓑青笠鎮相隨
細雨斜風都不管

念了齊唱漁家傲戴笠子

細雨斜風都不管柔藍軟綠煙堤畔鷗鷺忘機為主伴

無羈絆等閒莫許金章換

唱了後行吹漁家傲舞舞了念詩

喜見同陰垂匝地瓊珠藪藪隨風絮輕絲圓影兩相宜
好景儂家披得去

念了齊唱漁家傲舞披蓑衣

好景儂家披得去前村雪屋雲深處一棹清歌歸晚浦
真佳趣知誰畫得歸縑素

唱了後行漁家傲舞舞了念詩

波面初驚秋葉委風來又覺船頭起滔滔平地盡知津
濟涉還渠漁父子

念了齊唱漁家傲取檝鼓動舞

濟涉還渠漁父子生涯只在煙波裏練靜忽然風又起
羸得底吹來別浦看桃李

唱了後行吹漁家傲舞舞了念詩

碧玉粼粼平似掌山頭正吐冰輪上水天一色印寒光
萬斛黃金迷俯仰

念了齊唱漁家傲將檝作搖櫓勢

萬斛黃金迷俯仰輕舠不礙飛雙槳光透碧霄千萬丈
真堪賞恰如鏡裏人來往

唱了後行吹漁家傲舞舞了念詩

手把絲綸浮短艇碧潭清泚風初靜未垂芳餌向滄溟
已見白魚翻翠荇

念了齊唱漁家傲聚釣竿作釣魚勢

已見白魚翻翠荇任公一擲波千頃不是六鼇休便領

清晝永悠颺要在神仙境

唱了後行吹漁家傲舞舞了念詩

新月半鉤堪作鉤釣竿直欲干雲表魚鰕細碎不勝多
一引修鱗吾事了

念了齊唱漁家傲釣出魚

一引修鱗吾事了棹船歸去歌聲杳門俯清灣山更好
眠到曉鳴榔艇子方雲擾

唱了後行吹漁家傲舞舞了念詩

提取蘋鱗歸竹塢兒孫迎笑交相語西風滿袖有餘清
試倩霜刀供玉縷

念了齊唱漁家傲取魚在杖頭各放魚指酒樽
試倩霜刀供玉縷銀鱗不忍登盤俎擲向清波方圍圍
休更取小槽且聽真珠雨

唱了後行吹漁家傲舞舞了念詩

明月滿船唯載酒漁家樂事時時有醉鄉日月與天長
莫惜清樽長在手

念了齊唱漁家傲取酒樽斟酒對飲

莫惜清樽長在手清朝化洽民康阜說與漁家知得否

齊稽首太平天子無疆壽

起面外稽首祝聖

唱了後行吹漁家傲舞舞了漁父自念遣隊

湖山佳氣靄紛紛占得風光日滿門賓主相陪歡意足
卻橫煙笛過前村歌舞既終相將好去

念了舞者各吹漁家傲兩行引退出散

鄭峰真隱漫錄卷四十六

欽定四庫全書

鄮峰真隱漫錄卷四十七

宋 史浩 撰

詞曲

望海潮

叔父知縣慶宅并章服

煙籠香徑霞舒花砌東君繡出芳辰蝶羽弄鶯聲轉巧
嬉嬉舞態歌唇綸制出嚴宸曳曜春品服榮錫緋銀向
此華塗要路顏色倍精神 珠簾碧甃方新有蘭堂

快目水榭通津玉笋醮醴金蚪靄翠輪蹄盡集簪紳偕老
指雙椿望武林咫尺同上青雲異日重為此會應作鳳池
人

二 汪漕慶壽

煙濃柳徑霞蒸花砌春深特地芳辰蝶侶鬪狂鶯弄巧
嬉嬉舞態歌脣西園集簪紳正桂薰蘭玉天壽松椿競
捧瑤觥激灑來祝縱心人 當年輟侍嚴宸有星軫問
俗熊軾臨民康阜政成蕃宣治美歸休燕處申申行慶

紫泥新起釣璜國老東海之濱屈指重開此宴應已拜
平津

三 慶八十

熊羆嘉夢風雲亨會礪溪應卜之年黃菊萃英紅萸釀
馥安排預賞芳筵環珮擁神仙向粉額兩字金縷紅鮮
最好花裊展處雙鳳舞翩翩 人人競擘香牋燦珠璣
溢目祝頌無邊彭祖一分莊椿十倍千秋未足多言日
馭且停鞭把燕間歡樂分付壺天笑享親朋歲歲春酒

慶團圓

感皇恩

叔父慶宅并章服代作

健卒走紅塵芝封飛到金縷斜斜印三道舞鸞翔鳳猶
帶御爐煙裏茜衣新象笏銀章好對此況當鶯花繚
繞畫棟翬翬映蓬島繡簾初捲共指松椿偕老皓歌拚
爛醉金樽倒

二 收燈後會老

風雨攬元宵收燈方了深院紅蓮尚圍繞德星同聚更

有祥光交照始知真洞府春長好
應是化工偏憐衰
老賸把青藜作榮耀正須沉醉拚却玉山頻倒寄言更
漏子休催曉

滿庭芳

叔父慶宅并章服代作

烘錦花堤鋪錦柳巷曉來膏雨初晴畫堂初建碧沼映
朱楹最好芙蓉繡縵交輝敞孔雀金屏那堪更華裾滿
座和風動歡聲
冰清真美行棠陰善政槐市高名今
朝消得茜服光榮況是齊眉並壽誰云道樂事難并相

將見飛鳧過闕除目下彤庭

二 立春詞時方獄空

暖日輕融陰雲初斂一番雪意闌珊柳搖金縷梅綻玉
腮寒知是東皇翠葆飛星漢來止人間開新宴笙歌逗
曉和氣滿塵寰風光偏舜水賢侯政美棠陰多歡更
園扉草鞠水索長閒休向今朝惜醉紅粧映羣玉顏山
相將見宜春帖子清夜寫金鑾

三 次韻姚令威雪消

微霰踈飄驕雲輕簇短檠黯淡籠紗冷禁蘭帳清曉忽
飛花已是平蕪步閣那堪更折竹如蒼憑欄處關心一
葉歸興渺無涯 為瑞已多些適從狼子來自龍沙賴
吾皇神武薄海為家盡掃陰風殺氣依然放紅日光華
回頭看山蹊水塢縞帶不隨車

四 四明尊老會勸鄉大夫酒

鯨海波澄棠陰日永正宜坐嘯雍容歲豐民樂無訟到
庭中試數循良自古龔黃外誰可追蹤那堪更恩均耄

壽良會此宵同
璇穹占瑞處
熒煌五馬璀璨羣公盛
笙歌羅綺共引髯翁祇恐芝泥趨
召雙旌展獵獵飛紅
須知道君王渴見名久在屏風

五 勸鄉老衆賓酒

十載江湖一朝簪組寵榮曷稱衰容聖恩不許歸卧舊
廬中慨念東山伴侶煙霞外久闕仙蹤今何幸相逢故
里談笑一樽同 吾州真幸會湖邊賀鑑海上黃公勝
渭川遺老絳縣仙翁縱飲何辭爛醉臉霞轉一笑生紅

從今後婆娑化國千歲樂皇風

六 代鄉大夫報勸

油幕初開駢旄前導暫歸梓里春容致身槐揆功在鼎
彝中自是襟懷絕俗今猶記筆研陳蹤張高會君恩厚
賜樂與故人同 把麾鄞水上相看青眼誰復如公況
親陪樽俎笑接羣翁座上笑歌屢合須拚到曉日酣紅
公今去恩波四海桃李盡東風

七 代鄉老衆賓報勸

玉闕朝回沙堤煙曉碧幢光動軍容虎符熊軾行指七
閩中假道吾鄉我里揮金事思躡前蹤傾懷處螢窗雪
案猶說昔年同相看俱老大襟期道義不為王公念
兒時聚戲今已成翁敢借玉壺美酒還為壽金醖翻紅
仍頻祝中書二紀寰海振淳風

八代鄉老衆賓勸鄉大夫

復擁旌麾重歌襦袴滿城長是春容搢紳耆舊歡溢笑
談中盡道邦君愷悌逍遙遂湖海遐蹤今朝會公真樂

善屈意與人同 恩勤東道主揮金漢傳懷綬朱公引
羣仙環拱欲壽吾翁春甕初澄盎綠春衫更輕染香紅
持杯願歸登絳闕花萼醉春風

九雪

鶴冷風亭鴻迷煙渚曉來雪意真空釀成嘉瑞端為兆
年豐況有神媧妙手調和得雲彩皆同樓臺上鋪瓊綴
玉隨步廣寒宮 天公開地軸八紘混一莫辨提封又
須教歸禽狡獸沉蹤坐見花敷萬木誰知道春已輸工

三杯酒西湖父老相與話時雍

慶清朝

梅花

翠竹莖疎碧溪流淺綺窗為爾時開依稀遠岸纔看一點寒梅冷定半疑是雪風還度暗香來醉清興瘦策過橋黃帽清鞵繁枝正微雨後似怨人知晚淚浥冰腮慙慙百遶留連踏遍梅苔報道玉人睡覺菱花初試曉粧臺攜歸去粉額帶人比並輕擡

驀山溪

次韻貝守柔幽居即事

清談無限林下逢人少騎馬踏紅塵恁區區何時是了
名場利海畢竟白頭翁山簇翠水拖藍只箇生涯好
君侯灑落卜築開冰沼三徑直危樓徧巖隈幽花香草
風勾月引餘事作詩人詞氣凌雲寒瘦淪郊島

青玉案

生日

玉姬曾向瑤池舞輕擲霓裳忤王母從此煙霄飛鶴馭
一來人世有緣相遇得得為鴛侶年年此際霞觴舉
彩筆香牋染新句休餌靈砂奔月去齊眉不老直須攜

手同上青冥路

二 用賀方回韻

湧金斜轉青雲路每遡袞袞紅塵去春色勾牽知幾度
月簾風幌有人應在唾線餘香處年來不夢巫山暮
但苦憶江南斷腸句一笑忽忽何爾許客情無奈夜闌
歸去救救花空雨

三 為戴昌言歌姬作

年來減却風情火百樣收心待不做恰恨仙翁停畫舸

雪中把酒美人頻為淺破櫻桃顚
清歌誰許陽春和
悄不放遙空片雲過驚落梁塵渾可可一聲嚙處故園
春近桃李還知麼

西江月

即事贈官得我字

紅蓼千堤著藥蒼梧一葉辭柯夜闌清露寫銀河洗出
芙蓉半朵解帶初開紛面遠梁還聽珠歌心期端的
在秋波想得今宵只我

喜遷鶯

生日

鳳闕朱旂展弄罷五絃南薰敲竹雨糝桃蹊錢浮荷沼
一瞬染成新綠玉皇香案吏曹是時鶴飛江國對此際
每丹霄效瑞非煙郁郁卜築陶山曲風榭月臺圖畫
應難足綠綺春濃青蛇星爛肯便穩棲煙麓玳筵稱壽
歌皓齒霏霏珠玉競屈指看芝封紫檢鳴騶入谷

二

癸酉歲元宵與紹興守曹景游

征鴻回北正雪洗燒痕千巖勻綠魚縱新漪梅繁斷岸
春到鑑湖一曲滿城繡簾珠幌暖響聒天絲竹漸向晚

放芙蓉千頃交輝華燭 賢牧棠陰靜康阜政成褒詔
來黃屋玉筍光寒紫荷香潤人道此裝須趨且緩出花
銀漏恣飲寶觥醺醖向明歲看傳柑歸去腰橫金粟

三 收燈後會客

纔過元夕念燕賞未闌歡娛無極且莫收燈仍休止酒
留取鳳笙龍笛金馬玉堂學士當此同開華席最堪愛
是蘭膏光在金缸連壁 難覓交歡處杯吸百川雅量
皆勅敵老子衰遲居然懷感厚意怎生酬得況已倦游

客路一志歸安泉石但屈指願諸賢袞繡聯飛鵬翼

四 立春

譙門殘月正畫角曉寒梅花吹徹瑞日烘雲和風解凍
青帝乍臨東闕暖響土牛簫鼓夾路珠簾高揭最好是
看綵幡金勝釵頭雙結 奇絕開宴處珠履玳簪俎豆
爭羅列舞袖翩翩歌聲縹緲壓倒柳腰鶯舌勸我應時
納祐還把金爐香爇願歲歲這一卮春酒長陪佳節

五 守歲

雪消春淺聽爆竹送窮椒花待旦繫馬合簪鳴鴉列炬
幾處玳筵開宴介我百千眉壽齊捧玉壺金盞最奇絕
是小桃新折爭妍粉面 女伴同告語守歲通宵莫放
笙歌散酒暈朝霞寒欺重翠却憶鳳屏香暖笑扶滿身
花影遙指珠簾深院待到了道一聲穩睡明年相見

六 四明洞天

凭高寓目愛屹起四窗雲南雲北縹緲煙霞蕭森松竹
多少洞天巖谷著向十洲三島入海何妨登陸要知處

在皇家新賜西湖一曲
林麓真勝槩樊榭鹿亭百卉
生幽馥綠綺春濃青蛇星爛隔斷世間塵俗笑呼羨門
儔侶時引寶觴醺醪醉和醒但南山之壽難忘勤祝

點絳脣

我為勞生自憐浪跡天涯遍如今春換又是孤萍斷
誰信年時老子情非淺思量見畫樓天遠花倚斜陽院

二

千里歡謠使君美政高三輔沸天簫鼓笑擁鋒車去

卧轍攀轅謾擬雙旌住還知否禁林深處已闢金閨路

三

翠幄園林火雲方綬南薰起玉輪天外夜色涼如水

況有清歌勸我樽浮蟻拚沉醉萬花叢裏一枕朦朧睡

四

曾到蟾宮玉輪乞得長隨手數聲輕叩已自鏘瓊玖

最好長清渾不驚秋候歌闌後那回辭酒笑把遮檀口

木蘭花慢

明守王侍郎生日

伏審帝永蘿園天開人傑乃祖乃父忠勞久篤於王家
維熊維羆吉夢是生於男子彩綯朝陽之鸞鷲光騰天
上之麒麟豈惟相閔之英抑亦聖朝之瑞椒花柏葉王
正初過於三朝鳳蠟星毬燈夕匪遙於十日懿茲盛旦
宜溢歡聲恭惟某官昴宿儲神長庚孕瑞五百年之名
世王國克生八千歲而為春帝心簡在繇甘泉之法從
作鄆水之民師暫離玉立之班聊踐人生之貴公平政
教攬回六邑之陽和灑落文章改觀十洲之風月萃其

陰德獲是遐齡紫府茂萬福之祺黑頭佇三公之拜某
一厘受地千指戴天雖居原憲之貧實感文翁之化式
逢慶誕輒獻邑飲寄調於木蘭花侑歡於金焦葉仰祈
青矚少見丹衷干冒台嚴不任愧汗

喜陽和應律放佳氣滿寰瀛正雪洗疎梅雲浮淡月昨
夜生明熊罷信占夢好當年相閱再蟠英收拾仙風道
韻萃茲一點台星 功名壯歲逢真主紫橐耀西清向
玉筍光中瑤林宴裏來擁雙旌青氈我家舊物看長參

鼎鼐樂昇平春醕休辭介壽鶴書已播彤庭

漁家傲

留別孫表才

春恨不禁聽杜宇買舟忽覓東鄞路一笑輕帆同野渡
頻回顧吳山越岫俱媚嫵何事怱怱分袂去夫君小
隱臨煙渚明夜月華來竹塢相思處還應夢屬清江櫓

臨江仙

宰執得旨移庖復會執勤

袞繡蟬聯三重客朝回曉日曛曛綠楊門巷擁花驄喜
承天上語來作主人公
況值瑤林風露爽冰輪輾上

晴空桂香和影墮金鐘莫辭通夕醉明日是秋中

二 贈嬾人寫字

檻竹敲風初破睡楚臺夢雨精神背屏斜映小腰身山
明雙剪水香滿一釵雲 爐裏金絲簾窳地綺窗秋靜
無塵半鈎春筍帶湘筠蘭亭初寫就愁殺衛夫人

三 倚坐

繡幕羅裙風冉冉象牀檀幄低垂獸爐香裊錦屏圍不
貪欹細枕偏愛倚花枝 軟玉紅綃輕暖透温温翠袖

扶持正恢安穩坐移時雨雲忘峽夢身境是瑤池

鷓鴣天

過曇少雲丈室觀李子永
欲見贈佳闕走筆次韻

畫角梅花曲未終霜嚴飛落五更風誰知林外鷄三唱
推出紅輪海上峰官一品祿千鍾此時分付荷重曠
更教賜予雲南境絕勝湖邊九里松

二 次韻陸務觀賀東歸

我本飄然出岫雲挂冠歸去岸綸巾但教名利休疆鎖
心地何時不是春竹葉美菊花新百杯且聽遶梁塵

故鄉父老應相賀林下今方見一人

三 祝壽

孔雀雙飛敞畫屏錦花茵上舞娉婷紅綃袖暖琉璃滑
金鴨爐香椒桂馨丹臉渥秀眉青平生陰德在遐齡
如今便好添龜鶴元是南箕一壽星

四 送試

曉日重曨花露稀明光已報敞金扉三千彩仗翔鸞舞
數百銀袍振鷲飛開雉扇正垂衣奏篇初得上彤墀

臚傳遶殿天顏喜先折東風第一枝

蝶戀花 扇鼓

桂影團團光正滿更似菱花齊把勻嬌面非鏡非蟾君
細看元來却是吳姬扇 一曲陽春猶未徧驚落梁塵
不數鶯喉轉好著紅綃籠玉腕輕敲引入笙歌院

寶鼎硯

昔姑蘇士人繫囹圄元夕以詞求免守一見破械延之
上坐至今樂府多傳之惜其止叙藩方宴游之盛而不

及皇都真隱居士用韻以補其遺 霞霄丹闕瑞靄佳
氣青葱如綺纔半月東君雨露無限韶華生寶砌漸向
晚放燭龍掀舞周匝紅渠紺蘂況對峙鰲峰巖巖不隔
蓬萊弱水

聖主有樂昇平意引芝華雙輦凝翠紛萬俗歌謠管絃
聲混鶯吟鳳吹正漏永更深水輪掩映光接康衢萬里
似移下一天星斗粧點都城表裏 清警蹕忽登樓簇
綵仗錦襦絲履看柑傳數顆恩浹王公近侍散異卉覆

千官醉競捧瑤觴起願歲歲今宵宴賞春滿山河百

二

最高樓

鄉老十人皆年八十淳熙丁酉三月十九日作慶勸酒

當年尚父一箇便興周今十倍更何憂冲融道貌丹為

臉扶疎漆髮黑盈頭世方知非熊老聚吾州 有智略

可從茲日用有志願可從茲日酬天賦予怎教休瓊漿
且共飛千斛蟠桃應得見三偷諒吾皇恢復後盡封侯

壽仙翁

莫嫌春淺寒威俱斂陽和至此時方見木君敷令把雪
霜掃斷要集德星勝伴 為有仙翁正爾名喧蕃漢眉
壽比朏彭更遠兼資勲業已中雙鵬箭清步槐庭影滿

踏莎行

鄭開府出示諸公所
賦琵琶詞即席次韻

歌舌鶯嬌舞臉蜂細華堂是處皆頤指四絃獨擅席中
春移船出塞聲能繼 慢然幽情輕攏柔思其中有口
傳心事主人燈火下樓時偏渠領略深深意

生查子

即席韻陸務觀

雙蛟畫鼓催一水銀蟾滿見奪錦標回却倚花枝看
已擘冷金戕更釂玻璃椀歸去詫鄉關不負平生眼

江城子

片帆初落甬勾東碧湖空滿汀風回首一川銀浪颭孤
蓬且架兩椽煙雨裏凭曲檻浥空濛閒移拄杖上晴
峰莫怱怱伴冥鴻笑指家山蘋葉藕花中脚力倦時呼
小艇歸棹穩月瞳朧

浪淘沙

祝壽

祝壽祝壽筵開錦繡拈起香來玉也似手拈起盞來金也似酒祝壽祝壽命比乾坤久長壽長壽松椿自此碧森森底茂烏兔從他汨轆轆底走長壽長壽

瑞鶴仙

元日期回

霽光春未曉擁絳蠟攢星霜蹄輕裏皇居聳雲杪霽祥煙瑞氣青葱繚繞金門羽葆聽臚唱千官並到慶三朝雉扇開時拜舞仰瞻天表榮耀萬方圖籍四裔名王賚琛珍寶椒盤頌好稱壽聿祝難老更傳宣錫坐鈞天

妙樂聲過行雲縹緲逗歸來酒暈生霞此恩怎報

水龍吟

翠空縹渺虛無筭唯海上蓬瀛好瓊瑤宮闕藥珠臺榭
玲瓏繚繞弱水沉冥瑞雲遮隔幾人曾到四明中自有
神仙洞府煙霞裏知多少堪笑當年狂客愛休官何
須入道婆婆綠髮垂肩著甚黃冠烏帽花底金船月邊
玉局儘能遲老待丹成九轉飄然駕鶴却游三島

二 湖山勝槩金沙醱醑同架

平湖渺渺煙波是中只許神仙住人間空愛天桃繁李
雪飛紅雨誰信壺天靚粧玉貌春光容與似佳人才子
青冥步穩同攜手成歡聚老子時來燕賞擁笙歌留
連樽俎烏紗壓倒香雲簪偏知他幾度多謝東君肯教
滿架長情相處更須拚痛飲年年此際作芳菲主

永遇樂

洞天

鄞有壺天景傳圖畫聲著海縣四面攢峰皆七十二各
在窗中見祥雲擁蔽飛泉繚繞咫尺似天涯遠如今向

仙家覓得繫來十洲東畔 虛無縹渺蓬萊方丈所喜
只居隔岸羽憶垂珠瓊車織翠長是陪嘉宴豺狼遠跡
風波不作日月御輪須緩且銜杯稱賢樂聖度茲歲晚

迎仙客

洞天

瑞雲繞四窗好何須隔水尋蓬島日常曉春不老玉蕊
樓臺果是無塵到 沒智巧沒華妙箇中只喜風波少
青樽倒朱顏笑回首行人猶在長安道

南浦

洞天

一箭舜絃風向曉來輕寒初報麥秀蝶股歇花鬚韶光
老鶯聲倦聞呼友池塘暗綠數竿粉節天然瘦對茲美
景清歌妙曲千鍾芳酒 誰知別是壺中繚畫閣朱欄

煙谷雲岫三島十洲東青霄上神工幻成巖竇瑤臺閨
苑翠旌羽葆頻相就世凡洗斷教烏兔從今遲遲飛走

夜合花 洞天

三島煙霞十洲風月四明古號仙鄉縈紆雉堞中涵一
片湖光遶岸異卉奇芳跨虹橋隱映垂楊玉樓珠閣水

簾捲起無限紅粧
龍舟兩兩飛揚見飄翻繡旗歌雜
笙簧清樽滿泛休辭飲到斜陽直須畫蠟熒煌況夜深
不阻城隍且拚沉醉歸途便教徹曉何妨

人月圓

元宵

夕陽影裏東風軟驕馬趁香車看花粧鏡藏春繡幕百
萬人家
夜闌霧去星繁絳蠟珠翠鮮華笙歌不散踈鐘
隱隱月在梅花

二 詠圓子

驕雲不向天邊聚，密雪自飛空。佳人織手，霎時造化，珠走盤中。
六街燈市，爭圓鬪小玉，盃頻供香浮。蘭麝寒消，齒頰粉臉生紅。

粉蝶兒

元宵

一箭和風，穠薰許多春意。鬧娥兒滿城，都是向深閨爭剪碎。
吳綾蜀綺，點粧成，分明是粉鬚香翅。玉容似花全勝故園桃李。
最相宜鬢雲秋水，怎教他却去與莊周同睡。願年年伴星毬爛游燈市。

二 詠圓子

玉屑輕盈蛟綃霎時鋪徧看仙娥騁些神變咄嗟間如
撒下真珠一串火方燃湯滾盡浮鍋面 歌樓酒壚今
宵任伊索喚那佳人怎生得見更添糖拚折本供他幾
椀浪兒們得我這些方便

教池回 競渡

雲淡天低疎雨乍霽桃溪嫩綠蒙茸珠簾映畫轂金勒
耀花驄遶湖上羅綺隘香風擘波雙引蛟龍尋奇處高

標錦段各騁英雄
縹渺初登綵舫
簫鼓沸羣仙玉佩
丁東夕陽中拚一飲千鍾
看看見璧月穿林杪
十洲三島
春容醉歸去
雙旌搖曳夾路金籠

如夢令

醱醱金沙同祭

小院春風不老鵲
碧霓裳縹緲雪臉間
朱顏各自一般
輕妙忒棹忒棹
真箇一雙兩好


洞仙歌

茉莉花

瓊肌犬白淺著鵝黃
罩金縷檀心更天巧
筭同時雖有

似火紅榴爭比得伊家淡粧輕妙興來清賞處限真
香可惜只教生閩嶠這消息縱使移向蒸沈終不似凭
欄披襟一笑若歸去長安詭標客彈道勝醪醖水仙風

貌



鄧峰真隱漫錄卷四十七

欽定四庫全書

集部

鄭峰真隱漫錄卷

四十八至
五十一

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官助教臣卜維吉

謄錄監生臣李從亨

欽定四庫全書

鄧峰真隱漫錄卷四十八

宋史浩撰

詞曲

醉蓬萊

擬人賀生日

紀今辰高會屈指三朝便逢重九珠履瑤簪聚一天星
斗菊藥含芳桂花籠艷有美容爭秀袞繡堂中蓬壺影
裏香噴獸況是清朝太平真主治亨雍熙眷深耆舊

恩錫兼金遣星輅東走咫尺威光下拜歸美願我皇眉
壽自此重裁謝歲千紙年年回奏

聲聲慢

喜雪錫宴

風收浙漭霧隱森羅羣山萬玉差我禁街車馬銀杯縞
帶相過胥濤晚來息怒練光浮都不揚波最好處是漁
翁歸去鼓棹披蓑 況是東堂錫宴龍墀驟貂璫宣勸
金荷慶此嘉瑞明歲黍稷應多天家預知混一把瓊瑤
鋪徧河這一飲罄華戎同醉泰和

秋藥香

生日

玉露瀼瀼秋色似畫東堂燕席初開紅萸汎壽筇紫菊
上粧臺倚欄見新鴈已南來落霞孤鶩徘徊最奇處重
陽將起涼滿襟懷蕭灑秀眉華髮丹臉映瞳的皪如孩
擘香牋聽麗句新裁池上三回蟠桃熟玉纖猶捧瓊林
但願年年此會滿蓬萊繞對晴空麗日金籠畫蠟觥
籌舉連昏曉最堪羨主人雅好聚羣工亟成天巧一篙
穩送忘機所至不驚鷗鳥若也營求巨川通濟為華妙

恣斑衣豈樂浮家況宅永娛椿老

花心動競渡

遲日輕陰初雨收花枝濕紅猶滴玉鞦繡鶻纔得新晴
柳岸往來如織畫樓幾處珠簾捲風光徧神仙瑤席萃
佳景分明管領一陂澄碧忽見波濤噴激蒼煙際雙
龍起為勅敵桂楫撥雲鼉鼓轟雷競奪龍標千尺恁時
綵艦虹橋畔春容引寶觥霞液興濃處笙歌又還竟夕

水龍吟

次韻彌大梅詞

雪中落蕾嫣然美人莫恨春容少化工消息只須些子
陽和便了文杏徒繁牡丹雖貴敢誇妍妙看冰肌玉骨
詩家謾道銀蟾瑩白駒皎樓上角聲催曉是東皇絲
綸新草青旂蒼輅欲臨東闕遣伊先到排斥風霜掃除
氛霧直教聞早筭功高調鼎不如竹外一枝斜好

瑞鶴仙

是花堪愛惜謝天教花信添花顏色花紅襯花碧燦朝
陽花露珠頻滴花光的皜映花下花裊百尺趁花時手

撚花枝飽嗅此花消息 常恐一番花褪失了花容怎
生尋覓花神効力將花貌儘留得更移花並植仙家玉
圃不許花陰過隙向花前長把蕉花為花主席

喜遷鶯

清明

三春正美是霽景融和韶華如綺夾岸香紅登牆粉白
開徧故園桃李畫舸繡簾高捲錦轂朱軒低倚對此際
向池臺好處爭傾綠蟻 醉裏須醒悟些子芳菲造物
都謾你一瞬光陰霎時蜂蝶還付落花流水我有大丹

九轉真箇長春不死待得了把高歌清賞隨緣而已

菩薩蠻

清明

提壺謾欲尋芳去桃紅柳綠年年事唯有列仙翁清明
本在躬何須從外討皮裏陽和好堪羨箇中人無時
不是春

南浦

四月八日

天氣正清和慶西乾釋迦如來出世毓質向金盆祥雲
布層霄九龍噴水東傳霞旦正此日人人記露盤百卉

擁金容香湯爭來拂洗 誰知這箇因緣化衆生今求
塵埃脫離一點昭昭當須向茲時便知瞥地何煩手自
然作箇惺惺底若猶未悟且管領師僧八文十二

青玉案

入梅用賀方回韻

銀濤漸溢江南路汎短棹輕帆去破塊跳珠知幾度竹
窗新粉藕池香碧應在雲深處 蕭蕭鶴髮雖云暮曾
得神仙悟真句久視長生親見許離愁掃盡更無慵困
怕甚黃梅雨

花心動 端午

槐夏陰濃筍成竿紅榴正堪攀折菖斲碎瓊角黍堆金
又賞一年佳節寶觥交勸殷勤願把玉腕絲絲雙結最
好是龍舟競奪錦標方徹 此意憑誰向說紛兩岸游
人強生區別勝負既分些箇悲歡過眼盡歸休歇到頭
都是強陽氣初不悟本無生滅見破底何須更求指訣

卜筭子 端午

符籙玉搔頭艾虎青絲鬢一曲清歌倒酒蓮尚有香蒲

暈角簾碧紗厨揮扇消煩悶
唯有先生心地涼不怕
炎曦近

永遇樂

夏至

日永繡工減却一線節臨短至
幸有杯盤隨分快樂得
醺醺醉尋思塵世寒來暑往
凍極又還熱熾恰如箇脾
家瘡疾比著長些子
人生百歲一年一發且是不通
醫治兩鬢青絲皆伊染就
今已星星地除非爐內龍盤
虎繞養得大丹神水却從他
陰陽自變卦分泰否

鵲橋仙 七夕

金烏玉兔時當幾望只是光明相與天孫河鼓事應同
又豈比人間男女精神契合風雲交際不在一宵歡
聚乘槎曾得問星津為我說因緣如此

瑞鶴仙 七夕

霽天風露好乍暑退西郊涼生秋早銀潢炯雲杪擁香
車鵲翅凌波初到清歌縹渺凭危閣新蟾吐曜有盈樽
美酒蛛絲鈿合拜舞競分天巧堪笑世間癡絕不識

人中拙是珍寶多愁易老都緣是不聞道騁些兒機智
遭他驅使畢竟辛勤到了又何如百事無成是非較少

念奴嬌 中秋

碧天似水看嫦娥摩出一輪寒壁桂魄扶疎光照曜塵
界都成銀色萬象森羅羞明捲彩黯淡唯今夕風高露
重井梧濕翠時滴 誰信鶴婆娑鄮峰真隱對影為三
益虎繞龍蟠丹就後一顆清輝的皦不養銀蟾不關玉
兔到處無虧蝕三千行滿也能飛上璇極

芰荷香

中秋

過橫塘見紅粧翠蓋柄柄繁香月娥有意暮藹收盡銀
潢一輪高掛放同千里清光秋中爽氣天涼露凝玉臂
風拂雲裳老子通宵不忍睡把青樽小酌仍更思量
自家活計幸有無限珍藏大千世界靜極後普現十方
圓明不損毫芒精神會處獨坐胡牀

清平樂

李漕生日

池臺非霧縹渺雙溪路家在江南佳麗處看取謝公風

度蟠桃九醞千秋金蕉欲上遲留笑待錦花裯上雙
鸞舞徹梁州

二 同前

翠蛾雪柳鬢影春風透燈火千門輝綺繡移下一天星
斗騰拚連夜歡遊金波欲上遲留且看香梅影底雙
鸞舞徹梁州

三 游石頭城

石頭虎踞戎馬何能渡曾是六朝雄勝處瑞遶碧江雲

露 當時霸國多賢風流只解遺鞭便好揚舡比伐舉
頭即見長安

四 樞密叔父生日

萬花如繡淑景薰晴畫一曲齊稱千歲壽歡擁兩行紅
袖 當年西府橫翔急流穩上仙鄉笑閱磻溪日月行
看尚父鷹揚

五 代宰執勸趙丞相酒

槐庭元老四海真師表曲為故人光宗廟諱久要陋巷不嫌

時到虛堂已入涼
颼一觥為壽何詞看
即關河恢復
千秋永輔淳熙

六 勸王樞使

當年桂籍同展摩雲翼
位冠洪樞情似昔
肯共一樽瑤席
經綸素韞曾中籌
惟小試成功已殄潢池小醜行
收沙漠膚公

七

吾皇睿哲廷有真
三傑同向清時揚
茂烈掩迹臯陶夔

契 聯鑣忽訪山樊涼生花底清樽大史明朝日奏台
星皆聚柴門

八 待使相勸酒

南陽賓友道舊須樽酒一曲為公千歲壽絃索春風纖
手 忠謀黼黻明昌英詞錦繡肝腸帝所盛推頗牧人
間尤重班揚

朝中措 雪

凍雲著地靜無風
藪藪墜遙空
無限人間險穢一時為

爾包容 凭高試望樓臺改觀山徑迷蹤唯有碧江千里依然不住流東

七娘子 重陽

東籬壽菊金猶淺對南山把酒開新宴絳闕叢霄玉書丹篆坐間俱是神仙伴 童顏綠髮何曾變喜嬰兒姍女交相戀寄語詩翁茱萸重看明年此會人人健

惜黃花 重陽

秋光將老黃花開早露浥清曉金錢萬疊猶小簌徧碧

雲鬟壓倒烏紗帽更把玉觴同酌
過口添爐鼎朱顏
愈壯少道骨長仙風養成靈寶今日去登高謾說龍山
好悄不如自家蓬島

浣溪紗

翠館銀釵下紫清內家聞說慶嘉平
柳條萱草眼徧明
小閣數杯成酩酊醒來不愛珮環聲
為通幽夢到玉

京

臨江仙

除夜

臘月正當三十夜幾人到此惺惺一輪明月本團明廓
然無罣礙何用問前程 況有長生真妙訣歲華雖換
休驚但將歌酒樂昇平塵緣如未了明日賀新正

感皇恩

除夜

結柳送文窮驅儻嚇鬼爆火薰天謾兒戲自家爐鼎又
却冷清清地臘月三十日如何避 且與做些神仙活
計鈿永收添結靈水跳圓日月一任東生西委玉顏長
向此迎新歲

滿庭芳 五春

梅萼冰融柳絲金淺緒風還報初春木君青旆獵獵下
蒼旻親奉虛皇妙旨將枯朽咸與維親須臾見芳郊樂
圃生氣徧無垠青絲行白玉一杯介壽紅浪粼粼便
安排歌舞蝶翅鶯脣別有神仙窟宅乾坤內充滿氤氲
功成處花開不老酒熟鎮甘醇

撲蝴蝶 勸酒

光陰轉指百歲知能幾兒童稚老來將耄矣就中些子

彊壯又被浮名牽繫良辰盡成輕棄此何理 若有惺
惺活底必解自為計青樽在手且須拚爛醉醉鄉不涉
風波睡到花陰正午笙歌又還催起

蝶戀花

勸酒

玉甕新醕翻綠蟻滴滴真珠便有香浮鼻欲把盈樽成
雅會更須尋箇無愁地 況是賞心多樂事美景良辰
又復來相值料得天家深有意教人長壽花前醉

臨江仙

勸酒

自古聖賢皆寂寞，祇教飲者留名萬物叢。
裏酒如澠池，臺仍舊貫歌管有新聲。
欲識醉鄉真樂地，全勝方丈蓬瀛。
是非榮辱不關情，百杯須痛飲，一枕拚春醒。

粉蝶兒 勸酒

一盞陽和分明至，珍無價解教人囉哩哩囉。
把胃中些磊塊，一時鎔化悟從前。恁區區總成虛假。
何妨竟夕交酬玉觴金尊，更休辭醉眠花下。
待明朝紅日上三竿，方罷引笙歌擁珠璣，笑扶歸馬。

瑞鶴仙 勸酒

瑞煙籠繡幕正玳席歡燕觥籌交錯高情動寥廓恣清
談雄辯珠璣頻落鏘鏘妙樂且羸取昇平快樂又何辭
醉玉頽山是處有人扶著 追念搏風微利畫餅浮名
久成離索輸忠素約沒材具謾擔閣悵良辰美景花前
月下空把歡遊蹉却到如今對酒當歌怎休領略

永遇樂

桃李繁華芰荷清淨景物相繼霜後橙黃雪中梅綻迤

灑春還至尋思天氣寒喧涼燠各有一時樂地如何被
浮名牽役此歡遂成拋棄 如今醒也扁舟短棹更有
籃輿胡倚到處為家山看社酒野老為賓侶三杯之後
吳歌楚舞忘却曳金穿履雖逢箇清朝貴客也須共來
一醉

青玉案 勸酒

閒忙兩字無多子嘆舉世皆由此逐利爭名忙者事塵
中得喪仕中寵辱無恨非和是 誰人解識閒中趣雪

月煙雲自能致世態只如風過耳三杯兩盞眼朦朧地
長向花前醉

滿庭芳

遊湖

和靖重湖知章一曲浙江左右為隣繡鞦綵艦只許日
尋春正好厭厭夜飲都寂靜沒箇遊人夫何故歡闌興
阻只為隔城闔堪嘉唯甬水回環雉堞中峙三神更
樓臺繚岸花柳迷津不惜頻添畫燭更深看舞上華裯
拚沉醉從他伊喔金距報凌晨

二 茆舍

柴作疎籬茅編小屋遶堤苦竹黃蘆老翁蝸處却自樂
清虛理釣何妨釣直居琴又不管絃無逍遙處都捐世
慮忘我亦忘渠 雨餘添美景眉橫山嫵臉媚花腴笑
凡間粉黛濃抹輕塗客至三杯薄薄欲眠後一枕蘧蘧
起來見龜翻鶴舞却似壽星圖

臨江仙

戲綵堂立石名曰瑞雪
彌大作詞因用其韻

曾向泗濱浮玉質也居十二峰前飛來蘇髮尚如卷郁

紛因岫出巧鏤是誰鑄 挈榼凭欄成勝賞老夫亦自
頽然坐疑靄靄上瑤天已為蘇旱雨却放老龍眠

好事近

梅花

欹枕不成眠得句十分清絕一夜酸風閣雨醞江天飛
雪 曉來的驟看花枝頭老蚌剖明月帝所待調羹金
鼎莫教人輕折

二 次韻彌大梅花

對竹簾吟牋正是賞梅時節便把這些清致作東湖三

絕 帝家金鼎待調羹何似且休折却愛玉樓清弄褪
霏霏香雪

念奴嬌

次韻商築史秋香

銀潢耿耿正露零仙掌塵空天幕碧玉扶踈開萬朵偏
稱水村山郭巧醞檀英密包金粟只待清秋著三春桃
李自應東在高閣 好是月窟奇標東堂幽韻不管西
風惡獨立盈盈回首笑白葦丹楓索索折向冰壺莫教紗
帽醉裏輕簪却濃分長在自疑身到雲壑

二 親情拾得一婢念奴雪中來歸

枝頭蔭蕾褪紅綃微露江南春色多謝東風吹半朶來
入騷人瑤席粉臉輕紅芳心羞吐別有真消息粧臺簾
捲壽陽著意留得好是雪滿羣山玉纖頻撚汎清波
文鷁深院相逢人盡道標格都從天錫夢蝶徒勞霜禽
休妬爭奈伊憐惜高樓誰倚寄言休為橫笛

三 次韻樓夷觀潮

錢塘江上展紋綃初見長天一色風拭菱花光照眼誰

許紅塵輕積轉盼馮夷奔雲起電兩岸驚濤拍眼空破
地水龍爭噴吟笛 客有步屨江干曾吞奇觀寄英詞
元白素壁淋浪翻醉墨飄灑神仙蹤跡好待波勻橫飛
小艇快引香簫碧煙銷月出不眠拚了通昔

白苧

及韻真書記梅花

臘天寒曉風勁幽香頻吐精神掉約誰羨姑射若處江
南探春獨步恨無侶微語又誰管雪勢霜威埋妬且圖
少陵東閣作詩苦擬煩玉纖輕拗寧相許 惜取欄竿

遍倚月淡黃昏水邊淺不放紅塵染污名畫手丹青罷
施絳素不隨豔卉強媚韶光一瞬飄蕩無據祇恐金門
寶鼎方調時時未覩便把枝頭豆顆朝天去

浣溪紗

即席次韻王正之覓遷哥鞋

一挖鈎兒能幾何弓弓珠感杏紅羅即時分惠謝奴哥
香壓幽蘭蘭尚淺樣窺初月月仍多祇堪掌上壓瓊

波

二
夜飲詠足即席

珠履三千巧鬪妍就中弓窄只遷遷
惱伊剗鞵轉堪憐
舞罷有香留繡褥步餘無跡在金蓮
好隨雲雨楚峰

前

三

濕翠湖山收晚煙月華如練水如天
興來催上釣魚船
青箬一樽汀草畔霜筠數曲渚花邊
更於何處覓神

仙

四

梁武慙癡達麼獸箇中消息豈容猜九年面壁口慵開
隻履却尋歸路去一花元不是君裁這回枉了一遭

來

五

索得玄珠也是獸人人有分莫胡猜頂門一眼鎮長開
路斷玉關無輒跡雪埋葱嶺沒根栽始得達麼不曾

來

六

勝槩朱楹俯碧湖
蕭蕭風月一塵無
只堪綠蟻滿樽浮
況是小春天正爽
杖藜相與探梅初
半綻枝上未成珠

七

遠岫數堆蒼玉髻
平湖千頃碧琉璃
笙歌催我上船時
載月有如浮玉鑑
採蓮還復擁胭脂
更於何處覓瑤池

武陵春

戴昌言家姬供春盤

報道東皇初弭節芳思滿凌晨爭看釵頭綵勝新金字
寫宜春 四座行盤堆白玉纖手自和勻恰似蟾宮妙
麗人將月出浮雲

千秋歲

戴丈夫婦慶八十

吾鄉我里偕老真無比燕席展歡聲起藥宮仙子繞玉
砌菜衣戲稱賀處眉心競指朱書字 憶昔西周呂年
紀雖相似獨自箇誰為侶如今雙鳳老堪引同螺醉彭
祖壽十分方一那裏暨

新荷葉

真隱先生家居近在東湖茅屋三椽自有一種清虛秫
來釀酒便無後也解賒沽只愁客至不能拚此芳壺

且樂天真醉鄉裏無限歡娛時倚花枝困來著枕蘧蘧
回觀昨夢徒然使心勦形矐始知今日得閒却是良圖

瑤臺第一層

寥廓澄清人正在瑤臺第一層瑞靄處藥掩映金碧觚
稜異花非世種靄騰馥紫霧飛騰有仙駕過吾廬環堵

少駐雲軒 俄驚重壺疊嶽頓然蕭灑倍塵清珮環聲
裏寶觥瀲灩舞態娉婷祝言千歲壽仍更予五福川增
返蓬瀛問今朝茲會昔日誰曾

醉蓬萊

勸酒

喜泉通碧甃秫刈黃雲釀成芳酎瑞靄凝香更陽和鍾
秀曉甕寒光夜槽清響聽頷珠頻溜畫錦堂深聚星筵
啓一觥為壽 況此神仙藥宮儔侶玉殿英游盡皆親
舊羸得開懷對良辰握手醉席淋漓笑語都不問欲殘更

漏幕繡春風輕絲美韻明朝還又

如夢令

勸婦人酒後同

摘索衣裳宮樣生得臉兒福相容止忒精神一似觀音
形像歸向歸向見者擎拳合掌

二

粉臉霞生一縷掩映綠雲秋水言語更雍容具足十分
嬌美無比無比要比除非鏡裏

三

紅白杏梨肌理時樣新粧淡佇真箇似觀音少箇楊枝
淨水歡喜歡喜盡此一鍾醇美

四

羅鞵半鈎新月更把鳳鞋珠結步步著金蓮行得輕輕
瞥瞥難說難說真是世間奇絕

五

試把珠簾低捲宛見梅粧粉面綠逵更紅圍齊捧瑤卮
來歡堪羨堪羨此是神仙閬苑

六

一笑樽前相語莫遣良辰虛度
飲興正濃時兔盃聊分
春露留住留住催辦後筵歌舞

南歌子

熱水

藻澗蟾光動松風鱗眼鳴
濃熏沈麝入金餅瀉出温
一盞滌煩膺爽繼雲龍餅香無
芝朮名主人襟韻有
餘清不向今宵忘了淡交情

畫堂春

茶詞

小槽春釀壓香紅，良辰飛蓋相從。主人著意在金鍾。茗
椀作先容。欲到醉鄉深處，應須仗兩腋香風。獻酬高
興，渺無窮。歸騎莫惹葱蔥。

鄭峰真隱漫錄卷四十八

欽定四庫全書

鄮峰真隱漫錄卷四十九

宋 史浩 撰

童州須知

予起身寒微頗安儉素非官至未嘗陳觴豆退處率多暇日間口占數語以訓兒孫使知事君事親脩身行己之要錄之幾百篇目曰童州須知不敢以示作者姑藏其家欲其易曉故鄙俚不文然比之嘲風弄月則有間

矣留心義方者有取於斯焉淳熙辛丑下元真隱居士
書於清涼境界

君臣篇

渾沌判天地高卑未相親三才欲通貫中間須有人
最靈於物民至愚而神天地寄聰明動靜必相因飽食
無用心蚩蚩禽獸均逸居苟不教焉能敘彝倫天地憫
此類是故立君臣君以聖居上發政先施仁臣以賢作
輔法度期持循聖賢適際會利澤漸無垠君或肆酷虐

百姓皆嚮呻君或用忠怒四海熙如春臣或進諂諛改
僻正路堙臣或善諫諍君子之道伸所以委質者恭敬
日恂恂權倖不敢附賄賂不足珍窮達自有命烏可毀
天真挺然秉中正予以奉咨詢言必稱堯舜孟氏醇乎
醇從容引當道納誨每諄諄君如語好貨公劉道可遵
居行有積襄王業肇於豳君如語好色太王愛妃嬪當
時無怨曠後效應騶麟見牛未見羊王政此問津今樂
猶古樂樂在同乎民卒令歸正道何必批逆鱗拳拳愛

主心曾莫懈昏晨謀猷入以告歸美法君陳善則君所
有過思已自新況乃有幾事不密則失身但能持此戒
何愧古臣隣漢唐德既衰風俗愈不淳上下懷猜貳相
視如越秦上固好自用下亦非同寅克員苟爵位責效
蔑涓塵朝居廊廟上暮不齒簪紳嗚呼君臣間何乃如
參辰恭惟我清朝一德格穹昊起喜歌聲洽恩覃率土
濱

父子篇

太易本空空空中有太極太極判二儀萬物斯生植天地為父母萬物為子息人居萬物羣最曰具靈識兩家各生子匪媒其可得合禮成夫妻相共孕英特方當娠娠初疾嘔不納食妻既日呻吟夫亦日憂惻辛勤彌十月存亡未可測暨及震夙時痛楚千萬億稍或失調護淪胥在頃刻幸爾見嬰兒歡色動顏色乳哺更攜持幾年先用力母實鍾愛憐父亦思誨飭資稟尚凡庸視之如岐嶷驕慢不率教巧計為藏匿一語或中理誇揚其

肯默葆養覲成人庶幾供子職提孩知愛親此情何可
抑冬溫而夏清未足酌其德昏定而晨省未足酬其德
三牲滋美味未足酬其德四序紉華衣未足酬其德竭
身至老死未足酬其德碎身如糜粉未足酬其德男仕
女有行其常在親側悠然父母心相望長相憶問訊與
饋遺來往當如織口體所供奉無問一錢直親苟未沾
嘗享之寧敢即其有不安節歸省恨不亟母分嫡與繼
存心何間忒雖或不我愛其敢忘翼翼王祥躍水魚薛

包戀門闥馭車騫忍寒耕田舜引慝於此堅至行青史
斯刊勒切勿使偏親索處萱堂北富貴未解憂天倫乃
物則不應中道廢失性甘狂惑嗚呼霄壤間孰有無親
國女子遠外家間隙成荆棘男子聽婦言偏愛滋貨殖
禮容故背違言辭苦凌逼於義或參商於物或吝嗇劬
勞保抱恩總不存悃悞親老力已衰欲競知何克飲泣
更包羞煩冤滿胃臆父子情既離萬世恩之賊上帝實
監臨天禍陰誅短世事每好還子孫必凶愼嗟哉宇內

人身處禮義域忍將君子行輕以私意蝕受報方知改
站此嗟空陟生徒伍禽獸死則墮鬼域一念能回光悖
逆頓可熄吾言雖鄙俚萬古為矜式

夫婦篇

天地生萬物陰陽相配偶兩家因媒妁是以為夫婦男
貴有器識不問財薄厚女貴有賢行不問色妍醜二者
既相值家肥得長久二者儻不然舉動多掣肘夫無婦
承順何以事父母婦無夫應援何以事姑舅外或專放

蕩薄游酗樽酒內或資悍厲爭競恣紛糾儻信扎雞晨
長舌肆讒口離間骨肉親敗亂廉潔守居官解德操居
家失孝友漸漬不覺知頓使初心負故須礪剛方循循
常善誘使其良心生悔恨能自咎若也縱沉迷一切俱
聽受冥然在世間禽獸而扎堂堂六尺軀方足俱圓
首聰明不下人何乃畏仇偶子孫則象之餘殃貽厥後
吾言誠伐病宜以銘座右

長幼篇

父母有男女兄良必弟悌天性所稟賦初不煩法制如
何中道間閱牆成背戾蓋由結婚姻異姓以女妻妻不
嫻教訓夫不恤苗裔怨隙由愛惜紛爭為財計浸潤日
已久同惡遂相濟昆季若仇敵長幼絕交際孤然離索
身何以異狗彘當思父母心喜得賢子繼為彼慵懦兒
清陰均映蔽如何我自賢了不念同蒂宜罄友于情金
蘭彰夙契推心更及遠落地皆魯衛祥覽何人哉高風
馳萬世俚言雖不文將以助棠棣

朋友篇

先王德澤深士民皆修睦琢磨貴取友為學不應獨分
寧非君臣嚴光蹴帝腹人君尚擇交況乃為臣僕任宦
同恩榮庠序同誦讀萍蓬偶邂逅里閭頻追握手出
肺肝勤渠敘寒燠一旦臨利害獰然遂及目朱博先著
鞭索居歎蕭育不見管夷吾全交有鮑叔蘇章太不情
恩讎在隔宿不見庾公斯孺子生可卜嗟哉世間人雲
雨徒翻覆得喪自有天人豈能禍福險心懷五六壽命

多短促君子坦蕩蕩為之歌伐木

祭祀篇

文王御家邦風化必自邇采繁夫人職專言奉祭祀洪
惟祖先心貴得賢後嗣匪取一時孝覲其能事死蓋自
平生來功行勤積累防範不敢違貽厥作基址子孫洎
有室懵不知此理燕飲恣歡謔口腹縱奢靡霜降雨露
濡愴惕昧所履故其臨祭時倦色成跛倚酣歌或笑呼
憤怒或笞捶不恤祭如在大似不得已祖先必吐之豈

復錫繁祉我勸世間人於此莫輕視春秋祭享間齋戒
先恭已憂思動哀慕虔謹具芳美時物堪薦新當如奉
甘旨餽飮乎自供焉可使奴婢掃除蠲穢雜滌濯去塵
滓馨香出釜甑滋味登簋簠勿為貧故約勿為富故侈
豐儉或有常不可變其軌以此奉吾先神靈必歡喜繇
繇百世後餘慶何能弭

舅姑篇

女子年既笄出適乃從夫從夫始曰婦將以事舅姑舅

姑生男兒鼓舞更忻愉稟受胚胎成身體洎髮膚玩之
如美玉寶之如明珠覲其能立身孝養勤朝晡豈知壯
有室卻使失歡娛婦既恣狼戾夫亦與之俱翁嫗有憎
惡導夫起嗟吁叔妹有異胞俾夫肆欺誣及其享富貴
卻云夫自圖珍異私帑積貲產別籍拘不念翁與嫗生
爾夫之軀不念叔與妹爾夫當友于動輒生離間豈不
負心乎天殃或人禍捨爾其誰誅我有為婦法爾其聽
而孚凡事舅姑禮與事親無殊唯當輔君子相勉以相

須定省問安否溫清視衣襦俎豆奉燕樂几杖供扶持
出因侍坐席入則臨庖厨親意或欲與承命惟所需不
作曾元養問有必曰無親意所愛敬率行不敢渝當以
內則篇終身為範模其有疾病時憂惶問醫巫不眠衣
帶敝不食形容枯槁必自試寧敢離須臾以至復初
後吾身方得蘇其有貧困時四壁立家徒夫既日負米
不憚涉崎嶇婦亦憫其勞推食盈盤孟質貸如已盡素
手居窮途每務寬慈抱何嘗使向隅以其所以養麤糲

成甘腴親怒我勿怨親肥我獨臞忘飢日反哺豈不見
慈烏親既感爾孝祝爾多英雛佗日爾有婦復與爾同
符因知婦行孝乃自立根株出爾反乎爾曾不差錙銖
當時奉翁嫗後效收桑榆時哉不可失作詩勸踟躕

叔妹篇

婦欲事舅姑先當和叔妹叔妹不我和舅姑生怨慙伯
叔貴依義崇恩胡可廢晨昏同問安致敬斂身退語笑
不妄發正色絕冶態夜行必以燭相遇毋盼睐女妹貴

親暱唯當盡恩愛。梳洗混衣裳。粧奩同粉黛。威儀俾嫻習。紉縫勤教誨。其間有過差。識性須忍耐。伯叔各生子。嬉戲魚同隊。切勿分彼此。愛猶我兒輩。姊妹或歸寧。親戚無阻礙。童稚既撫存。僕妾亦下逮。彼於父母前。豈不知欣戴。遂使高堂言。吾子得賢配。推此厚族黨。睦婣居外內。心期在陰德。施惠每韜晦。喪葬乏資財。男女未婚對。稱家之有無。彼必懷感佩。歲時饋壺漿。燕享盍簪玳。貧富與貴賤。待之宜一槩。猗歟行此行。婦德無瑕類。萬口

併一談可貽彤管載

娣姒篇

兄弟各授室爰歸事夫祖是為叔伯姒異姓始相聚習
氣或冰炭安可一塗取故當專和柔順適無違拒彼有
妬嫉心作意相狎侮惟知以善誘不異魚相與彼有狼
戾心凌轢猛如虎惟知以理遣茹剛宜勿吐奴媵工讒
譖間謀多簧鼓嬰孩羣戲弄叫唬負冤苦恩怨霎時間
信之誠無補見境勿動懷表吾中有主子姪無分別一

意思存撫不見北平王
貓尚能相乳財物有通無寒温
均帛縷不見柳河東
數世同門户今人有女兒不教以
規矩唯與婢妾羣
曾不師保姆一旦入夫門
驕橫不足數長舌為厲階
扎雞晨風雨夫既無剛腸
間言遂旁午兄弟若仇讎
有面不相覩異爨或索居
分財或析土同胞謂慈親
同氣謂嚴父一旦因汝來
各使失依怙我故作是詩
為世開朦瞽

臧獲篇

人生貴適意安佚固有以便嬖足使令臧獲皆率婢婢
實居深閨奴當立階祀內外儻致嚴家法斯盡理怙勢
以作威招權自豐已奴或有是人刑罰不可弛銜冤恣
狠傲妬寵專負恃奴或有是人斥逐其可已處衆能包
容見得思廉恥守分每知足愛主常歸美忠謹輩行服
和柔姊妹喜為之有室家周旋表終始其或小瑕疵過
誤非姦宄第當明戒飭勿遽施鞭捶其或肆讒間作意
生荆杞第當親骨肉不可黨奴婢骨肉長聚頭奴婢安

可擬凡百御下人讀此味其旨

鄮峰真隱漫錄卷四十九

欽定四庫全書

鄭峰真隱漫錄卷五十

宋 史浩 撰

童州須知

敬天篇

古者明良會君臣必敬天小心常翼翼終日自坤乾雷
電彰威怒星辰是變遷凌競每寅畏上帝必垂憐

傳道篇

帝王學有源執中以傳道塞路排揚墨逃親鄙釋老大
學吾所行中庸吾所保直下肯承當後人斯有考

修德篇

生身天地間所貴在修德衆善既奉行諸惡當屏息美
利世同霑陰功人不識冥心契上天享祐無紀極

恤民篇

主聖臣賢日勤政在恤民差徭唯務息賦斂直須均但使
皆當富何憂富却貧孟公仁義說不取利吾身

措刑篇

堯舜雍熙治成功在措刑哀矜行法令欽恤愛生靈若
使殺無罪寧教失不經于公尚陰德何況是朝廷

樂聲篇

樂聲表至和在乎民共樂百姓或怨咨八音徒振作朝
歌商紂搞煖響奏嬰縛四海得歡心全勝聽絃索

忠恕篇

君子行忠恕報恩不報仇恩者人善意一飯亦當酬仇

者被迷誤事過何足尤持之久不倦其心乃休休

疏財篇

人生貴疏財過富誠多事愚固益其過賢亦損其志指廩
憫人窮揮金侈上賜萬古播清名誰云能敗類

見德篇

凡人在世間不曉乘除理非義或得財捫心未可喜俸
祿却蕭條子孫仍委靡更有禍隨身陰譴何時已

習尚篇

習尚從何來影響由先世好禮必溫恭收書乃文藝初
心儻不思後弊必難制古人約其身所以裕苗裔

宮室八篇

茅茨不翦階三尺自古唐虞是聖人萬樂阿房歌舞地
只消一炬化為塵

大禹卑宮自一身能令四海敘彝倫雕牆峻宇垂丕訓
更有遺風及後人

相國當年葺未央欲將壯麗奉高皇誰知後裔求增廣

萬戶千門起建章

檉題數尺聳高堂得志吾人正未遑若有賢名并德行
茅茨之下亦風光

廣廈須增千萬間普令寒士盡歡顏少陵自處知何所
低小茅簷鷺往還

數間破屋洛城中却有高名振古風寄語紛紛美宅者
安居寧不愧盧仝

結廬休與梓人評此輩唯知侈棟楹身在地方歸未得

歸來卻始悔高明

乞身間退本何圖
賜第俄然處帝都
報德未忘三捷奏
祈天且辦一重鑪

輿馬八篇

吾皇多暇只觀書
田獵游盤一事無
北伐日行三十里
何曾異域市名駒

為國先須班馬政
蓄儲專以備兵戎
近來貴室豪家子
金勒雕鞍縱侈風

文帝卻回千里馬項王獨愛一名騅烏江不渡騅難逝
細柳徐行馬不馳

車如流水馬如龍從此諸郎不得封無限外家多敗類
獨餘馬氏著謙恭

輜車乘馬君王賜不賞邊功即子賢外物何須勤覬望
惟於事業每加鞭

婦人自處只閨房車馬寧須侈鬧裝莫與他人爭富貴
從來儉素足輝光

少時常是出無輿徒步徐行亦當車近日堪嗟隨俗變
便無人與也騎驢

衰殘無似一臞儒聖主恩容帝里居每到傳宣陪燕侍
東華門裏賜肩輿

張設八篇

簾帷聊欲障堂皇有德何須錦繡光西漢孝文真誼主
殿中只集上書囊

晉帝當時自不君卻將步障助驕臣石崇不為綠珠死

天譴窮奢故殞身

嗜慾煎熬豈有窮羅屏繡幕圍香風更添錦綺為華飾
不念寒家四壁空

蝸涎苔蘚不能除覓得碑文當壁衣富貴一朝還自恣
盡將錦繡繚牆圍

庶人屋壁施文繡賈誼言之太息時不獨庶人須禁止
有官君子亦當知

帷幕時間奉此身當知流轉會成塵隨緣且用遮空壁

莫較數陳舊與新

絹帛鮮華由染工
紅花紫草遂收功
若教明眼人猜破
始信浮生色是空

平時敗壁舊泥空
蘆席將來謾禦風
不是君恩令仕進
何因滿眼掛青紅

衾褥八篇

錦縠綾羅不足貪
無過紫紺與紅藍
仁宗一味黃紬被
萬古傳揚作美談

貴家獸炭擁紅爐
衾褥重重綺繡鋪
當念蓬窗飢寒女
一鍼一縷用工夫

自古賢人起細微
王章涕泣卧牛衣
若還遇主居溫燠
勿忘當時處布韋

貧家何事苦勞心
終歲經營一布衾
男女夫妻同蓋覆
依然冰冷過更深

女子生來享富華
安知門外有寒家
風嚴雪滿多殍死
只為無錢賣苧麻

被衣不要大温然，滕理開舒易感寒。譬如簷隈生草木，不禁霜雪便彫殘。

我生自幼識艱難，枕席雖温敢自安。安得衾裯無限數，普令天下不憂寒。

夢幻浮華有此身，青氈已舊不須新。百年撒手成歸計，多少衾衾屬別人。

玩好八篇

聖主中局日湛然，白珩不重只尊賢。更於老氏求三寶，

慈儉每為天下先

異物叢珍品最高此心不可動纖毫
西戎慕義陳方物
太保猶先作旅獒

德產精微偏海隅誰知寸寶可亡虞
果聞晉國成功後
垂棘還同合浦珠

六國精英輦運來粧成舞殿與歌臺
金塊珠礫今何在
但見阿房滿地灰

文帝勤勞養慶源力行恭儉為元元
後王猶聽姦臣奏

獨為青驄伐大宛

內家嗜好淡無營
天下方知仰聖明
唐帝若無倪若水
南方黔首怨鷓鴣

人鬼幽明兩不關
人生只畏鬼為姦
欲知古器從何得
盡出丘陵冢墓間

穀粟桑麻不可無
賸求珍玩欲何如
道人家具唯清淨
不用巾箱巧貯儲

衣服八篇

葛覃專美后妃賢浣濯衣裳是所先若使身無恭儉德
金珠鏤繪設新鮮

巧把真珠縷作襦爭奇鬪好儘功夫文皇海內多絲帛
只為夫人曳地無

織者何人衣者誰越溪寒女漢宮妃宮妃莫道無青史
馬后先傳大練衣

人君風化匪虛文舉動常令天下聞唐帝宮中三浣濯
未如晉武雉裘焚

柔桑春繭未登盆催稅公文已在門一口無辜繫囚獄
全家號泣動鄉村

官中催稅急如絃納中還須陪費錢若有紕踈并糊藥
忍看捧血滿庭鮮

千梭札札未成端織了先須納縣官請得卻資泥土用
不知機上忍飢寒

蠟屐平生能幾兩衣裘粗足莫貪多愚哉富室千箱積
回祿穿窬汝奈何

酒醴八篇

歡欣歌飲皆從欠樂極悲哀自此生不見古人成禮處
主賓百拜只三行

越主投醪仇可報商家沈酗自相攻的知此物難多飲
只為邦家作禮容

為子孫順為臣忠夫妻和睦弟恭兄如何卻致彘綸斃
只為貪他酒味醲

平日恂恂號古人三杯纔飲亂天真精神憤憤如癡夢

羸得時時病在身

酒可忘憂更養神直須少飲始為真君看阮籍劉伶輩
終為沉酣喪此身

女子親傍禮法拘合移孝道事翁姑若還徑醉無醒日
亦自無心相厥夫

居家姆傳未曾成纔及笄年便有行中饋既然長醪酌
兒孫婢僕盡縱橫

休說私酤趨得錢官場警捕致憂煎錐刀未必成家計

家計因茲卻蕩然

膳羞八篇

聖主勤勤欲措刑何嘗黷武愛興兵四方罷貢傷生物
愈見仁恩浹有情

設牧端因饗鬼神大亨亦為養賢人掄材祈福緣何事
只為蒼生不為身

滄茫麥飯出忽忽禁鬻天廚未必豐若使平安能念此
鉤羹土墉古人同

嗟見時人大侈生八珍同聚一杯羹若知過口成汙穢
何用留心事割烹

物因相勝還相啖弱者多為強者亨勿謂天教充食類
斯人豈為虎狼生

二膳朝朝飽即休何須嗜殺苦營求魚蝦蟹蛤皆微細
數百方能滿一甌

飛潛蠕動盡貪生就死無辜或自鳴只可為親甘旨具
自家口腹莫頻亨

戒殺當知有數端聞聲見死敢加餐居家自作專因我
雖美還應下筋難

古語曰見殺則不食聞殺則不食家
所自殺則不食專為我殺則不食

梳粧八篇

隨宜首飾莫留情珠翠雖多未是榮不見孟光居儉約
荆釵却立萬年名

南蕃有鳥翠歲幾千百為羣自在飛負痛銜冤無罪死
將來貴室縷冠衣

貴家所好若無偏翠羽真珠不直錢簪珥一求難得貨

窮山深海盡騷然

生靈膏血是緡錢
買得珍珠顆顆圓
痛惜鮫人在深海
風潮沉溺幾多船

北珠天產在戎蕃
不定還看走玉盤
鉅萬費錢收拾得
到頭終不救飢寒

繡草鋪茸玉作冠
四時花樣幾千般
當思蓬首寒窗女
終歲無油兩鬢乾

倡優卑賤起淫風
塗澤唯知特地濃
珍重賢門貞潔女

不施朱粉自雍容

常須默坐悟前因為愛
鉛華墮女身若也於斯能改悔
來生定免落風塵

稻梁八篇

后稷星光燦混儀天教墮地作農師
牛羊腓字寒冰暖自有神明默護持

方冊嘗觀無逸書更於七月誦豳詩
周公愛主真深切稼穡艱難先使知

能述先王播殖功伯禽之後有僖公故雖牧養駟馬盛
務惜吾農不起戎


文帝年年下蠲書唯憂農畝不豐餘匈奴嫚侮吾甘忍
所喜千倉飽貯儲

武帝征誅不厭頻太倉無復有陳陳末年戶口多虛耗
卻始封侯欲富民

古者四民今六民為添釋老不耕耘三農重困皆因此
況有張頤百萬軍

勿嫌糠粃勿嫌陳當念農家種苦辛輸得逋租盈廩膏
却歸耕隴作饑民

代耕有祿及嬰孩飲啄當知所自來若也食焉無怠事
庶於報國有涓埃



鄭峰真隱漫錄卷五十